

BULOBA BÙDI KÀBÌDÌ

MUNKACÌ MWÀ KUDÌSHÌNDA

 Amen. Mukalenge ànùbènèshè. Nudi mwà kusòmbaayi. Byùmvwika bímpè bikolè bwà kulwa dilòòlò edi nè kunùmvwa nutùmbisha Mukalenge, kwalukila cyàkàbìdì kumbèlu nè kumòna muntu yònsò. Mvwa mwindile cyòci eci kacya ànu ku Disàkidila dishàale pàmvwà mwab'ewu apu, bwà kwalukila cyàkàbìdì ku tabernacle wanyì. [Disangisha didi dyàmba nè: “Amen.”—Muf.] Ncyèna mumanyè kwàiyè to. Nyèyè ewu lwà apa. Ndi ànu ndìkonka ní ùcìvwa ànu mwà kutwà “amen” ku cyòci aci, nudi bamanyè's. [Mwanèètù Moore ùdi wàmba nè: “Amen.”] Bidi misangu yònsò ànu bímpè bwà kwikala kaaba aka. Nè mvwa mwindile, bu mungàmbì, kwambwila ànu ku Disàkidila dishàale.

² Tudi bafùme ku dishiya Cimenga cyà New York, mutùvwà benze kàmpanyè kalenga kàà dikèma. Mukalenge mmutùbènèshe kuntwaku mu mùshindù wà makàndà. Nènkutuvwa tusanganyibwa ku Morris Auditorium, nè misùmbà yà bantu bapàtemù patapata, kuulu nè kwìnshì kwà misèèsù. Nènkubàvwa mwà kwimana pambèlu apu, bindile. Bu—bu muntu mwà kulwa, ànu mubandidi, nudi bamanyè's, nè mufwànyine kwela meeji, èè, cintu kampànda's; bàmwè bantu, nudi bamanyè's, bàyaaya mu èkèleeziyà, nè pashìishe katanci aka, pàdì cintu kampànda cyàmbiibwa, cìdìbo kabàyi baswè to, nebàjuuke bàkwàta njila bapàtuka. Nènkubàvwa pambèlu apu bèela tukàndà twà masungulangana nè, nganyì uvwa mwà kwangata nkwasà awu dîbà òvwa bapàtuka. Nènkumvwa mpicilakù dilòòlò dyònsò, nè mu bule bwà too nè ku misèèsù yisàtù, nènkubàvwa mwà kwikala bapàte kuulu nè kwìnshì kwà misèèsù. Kàdi's Mukalenge uvwa mutùbènèshe bulelèlè nè mutùpèèshe misùukà, nè dyondopiibwa dyà masààmà manène àbùngì òvwa dyenzèke.

³ Nè pashìishe ku didyà dyà dindà dyà Beena Kantu-ku-byanza, tuvwa bapicile mu cikondo cyà dicyònkómoka, kusùmbishabo tikè yàbò kumana. Nè—nè pashìishe mémè kudyàmbidila nè bàvwa nè cyà kubweja nkàmà, yà bàvwa kabàyi nè tikè to. Dîbà adi kuujabò tujila, nè munda mwà cibambalu mwònsò nè biibi, nè bikwàbò. Nènkutudi bapicile ànu mu cikondo cyà dicyònkómoka cilenga be. Nsaserdòsè wa ba-Épiscopaliens nè bikwàbò byònsò kuntwaku, nè Mukalenge mmutùbènèshe bikolè menemene.

⁴ Ke pashìishe twètù kwimanyikila kumbèlu, kwànyì kumbèlu

mwônsò mûndi naamù bwà Mukalenge Yesù Kilistò, pândi mwab'ewu apa. Ncyèna mwaba ewu bwà kiipàcìlà kakwàbò to ànu bwà kuMukwàcila mudimu, nè ku dyànyì pàànyì dimanya, nè bwà kunùtwàdila Dìyì ànu mùdìDì dimpèèsha amu, kusambidila babèèdi bèènu nè beena ntàtu. Mpindyewu, netwikalè nè dilòòlò dimwè, anyi àbìdì, Mwanèètù Moore nè mèmè netùsangilè pàmwè, bwà twamònakù mwà kusambidila babèèdi.

¹⁰ Dìbà adi, dilòòlò dyônsò, tudi baswè bwà muntu yônsò udi kàyì mwena Kilistò awu, tutèkemena nè cintu kampànda necyàmbiibwè anyi cyènjiibwè, bwà wamòna mwà kulwa mwena Kilistò. Nènu pawikala kùyì nànu to, pawikala mumanè kwitabuuja Mukalenge Yesù Kilistò, nè muMwitàbe nè mubàtìiibwè, kàdi kùyì mwanji kupeta Nyumà Mwimpè to, kùpicishikù eci to. Lekèlaku ànu eci cìkale dyèbè dilòòlò. Bwalu, vùlukààyi nè, nekwikalè ànu mènà búngì kampànda mu Mukànda awu. Kàdi pàdì dìnà dyà ndekeelu disàkidiibwa, ke cyônsò cìdiku aci. Nènu dyèbè wèwè's ndifwànyine kuWùkumbaja's.

¹¹ Pàakalwà Mwànà wa mùkòòkò nè kwangata Mukànda mu cyanza cyà dyàbalumè cyà Ewu uvwa musòmbe pa Nkwasa wa butùmbi awu, ùvwa ùvwa m'Mukànda wà Bupikudi. Nè mènà àvwà mafundamù kumpàlā kwà difùkà dyà dyulu nè buloba awu. Pàakabiikidiibwà dìnà dyà ndekeelu adi, Mukànda awu, ndongamu awu, bikwàbò byônsò byàkabuuludiibwa musangu awu, Bitampì Mwandamutekète byàkabuuludiibwa kùdì Mwànà wa mùkòòkò. Maalu masokoka à Bible mujimà nkòòng àvwa masokoka munda Amu. Bu twètù nè dìbà, mvwa muswè. . .

¹² Ndi mfuma ku dijikija Bitampì Mwandamutekète abi, ànu àbìdì àdì panshi aa. Ndi muswè kubikenketa cyàkàbìdì. Kàdi ànu mùshindù mwinè wàkatùbènesàhà Mukalenge's wè! Bààbúngì bàà kunùdì bàkaadikù bumvwè bwalu abu, nè babalè mu cikàndàkànda cyà *Life*, nè bikwàbò, bintu bìvwà byenzèke munda mwà ciinè cikondo aci. Kàbìdì, pàakakwàtābò fòtò, nànsha mene, wa Banjèlò mwandamutekète abu, mùvwābi bidyānjila kwamba patwākayā ku Wesètè apu. Ke kungambilaYe, ngondo yisātu kumpālā, mwaba ùvwāci mwà kwikala nè mùshindù wùmvwā mwà kwikala mwimāne mwaba awu, kàdi's ke cyôci aci's! Nè—nè byamù byà fòtò, kaa, ntàntà wa nkāmà yà kilòmèètà, mbicikwāte fòtò ànu mwaba awu mene, ànu menemene. Bìvwā bidyānjila kwamba ànu mu byôbi menemene! Nènu piikalābi nè nkāātukù muiyishè cintu cyà cisonsola, mu nsòmbe wanyì, m'Bitampì Mwandamutekète. Nè pa nànu ndi mumanyè nè tukàadi ku cikondo cyà nshìikidilu.

¹³ Nènu dìnà dyà ndekeelu didi diya mu Mukànda awu, anyì, dìnà dyà ndekeelu didi dipikùdiibwè adi, dyàkafùndiibwà mu Mukànda awu adi, aci's ncikòse bwalu, Udi ùlwa bwà kunana cidiYe mupikùle. Nè ncifwànyine kwikala cikondo cyà

pabwàci. Nukààdikù bakwélèlè meeji nè: bantu nebàtùngunuke ànu nè kuyiisha, èkèleeziyà neàtùngunuke ànu nè kwela meeji nè bàdi munkaci mwà kupeta bantu basùngidiibwe. Dìbà dikaadi dimane kupita pa dìbà adi, kwònsò nkumanè kujika, nwamònu's, nè Mukenji newùye too nè kùdi bàdi bajimine ànu menemene; ànu mwàkenzàbi mu matùkù à Noà, matùkù mwandamutekète mu bwàtù. Cyàkenzeka mu matùkù à Sodomà. Yesù Yèyè mwinè, citùpà Cyèndè—Cyèndè ciisàtù cyà mudimu Wèndè wà bwambi, Wàkaya kayiisha misùukà yìvwà mijimine Cyèndèlèlè ayi, yìvwà mu bùlokò, yìvwà kayiyi minyingàlale to, mu lutùulù lwà mu matùkù à Noà. Kàdi katwèna bamanyè nè ndìbà kaayi didi bintu ebi bifwànyine kwenzeka to.

¹⁴ Kàdi twikalàayi badimwìjiiibwe. Lekèlaayi kujèmbelèla, twènzàayikù cintu kampàndà pa bwalu abu. Twètù katùyì bakùmbànàngàne nè Nzambi to, tùditéekaayi ànu mu bulongàme nè Nzambi.

¹⁵ Musangu kampàndà, ngèèla meeji nè, mu nshapità wa 11 wa Maatàayi, ngèèla meeji nè mmùdibi, lwà ku mvensà mwì6, anyi cintu kampàndà, ncyèna mutwìshiiibwe to. Nnshapità wa 11, bwà aci ndi mutwìshiiibwe ànu menemene. Bayiidi bàà Yone bàakatumiibwa kùdi Yone, musangu kampàndà, bwà kumòna Mukalenge Yesù, bwà kuMukonka ní Ùvwa Yèyè awu menemene, anyi ní bìvwa bikèngela bwà kukèbabò mukwàbò. Yèyè nè: “Ndàayi nùkaleejè Yone bintu bìdi byènzeka ebi. Nùmwambilè nè: ‘Wa disàka ng’ewu udi kàyi ùlendwishiibwa mu Mèmè to.’”

¹⁶ Nènkù dìbà adi pàakasambukàbo kakùnà, nè Yesù pàmwàpa wàkabàtàngila, kwambaYè nè: “Nuvwa bapàtuke bwà kuya kamòna cinyi?” Ke bôbò...Yèyè nè: “Nuvwa bayè kamòna muntu kampàndà muvwàle bilàmbà bìmpè anyi?” Yèyè nè: “Abu bàtu mu nzubu ya bukalenge yà bamfùmù. Kàdi dilèngè dinyùkusha kùdi lupeepèlè anyi?” Yèyè nè: “Nuvwa bayè kamòna mupròfètà anyi?” Yèyè nè: “Ndi nnwàmbila nè, mutàmbe mene nè mupròfètà. Bu nwènù mwà kucyàkidila, yèyè ewu ke wàkamba mupròfètà, Maalàki 3 nè: ‘Nè Mèmè nèntumè mùsànjeelà Wanyì kumpàlà Kwànyì.’”

¹⁷ Bayiidi bààkeela lukonko alu musangu kampàndà. Bàakamba nè: “Bwà cinyi bafùndi bàdi bàmba, balongeshi bàà Mifundu, nè: ‘Eliya ùdi nè cyà kwanji kulwa dyàmbedi kumpàlà kwà byôbì ebi, bintu byònsò ebi kwenzekabi?’” Mpindyewu vùlukàayi nè, Yèyè ùvwa ùyiikila nè bayiidi, kì nnè Bàfaalèsà to. Bayiidi, bàakamba nè: “Bwà cinyi bafùndi bàdi bàmba nè: ‘Eliya ùdi nè cyà kulwa dyàmbedi?’”

¹⁸ Yèyè nè: “Eliya ùkaadi mumanè kulwa, nè bôbò bàakamwenzela cìvwàbo balongòlòle aci, kàdi nwènù kanùvwa bacimanyè to.”

¹⁹ Ambàayibi túng bu nwènù mwà kujandula dīngà ditùkù, bu twètù bakafika ku cipungu cyà dikènga dinène anyi cintu

kampàndà, wêwê kwamba nè: “Èè, pàànyì’s mvwa ngèèla meeji nè Dyambwibwa òvwa nè cyà kulwa dyàmbedi”? Nwamònu anyi? Nènku òyì òvwa mwà kwalukila nè kukwambila nè: “Dyambwibwa dikaadi òmanè kwenzeka, kàdi wêwê kùvwa mucimanyè to.”

²⁰ “Ànu mwàkadibì mu matùkù à Noà, mwàkasùngidiibwà misùùkà mwandamukùlù ku màyì amu, ke mwìkalàbì kàbìdì ku Dilwa dyà Mwànà wa muntu.” Bantu bàdi ànu bàtùngunuka, bèèla ànu meeji nè bàdi bènza ànu cintu cidi cijaalàme, piinè apu kwònsò kumanè kujika. Éyì Nzambì wa yààya, ikàlàku neetù luse’s! Twànjàayi, twànjàayi kukenketa, mpindyewu mene mu malòòlò makèsè àdi àlondà aa, tumòne mwaba wutùdi tusanganyibwa.

Twìnyikàayi cyàkàbìdì mitù yètù.

²¹ Mukalenge Yesù, nè bintu ebi mu meeji, nè bileejìibwe kùdì èkèleeziyà ewu, bileejìibwe kùdì bantu aba; Nzambì, ndi ndòmba bwà Wàsùngilakù musùùkà wònsò mu Shreveport, musangu ewu, ùdi mufùnda mu Mukàndà awu. Kwòkò kwikàle bàmwè mwab’ewu bàdi kabàyi basùngidiibwe to, Taatù, swàkù bwà edi òikale òibà òidìbò basùngidiibwe. Kwòkò muntu mu òisangisha edi, òilòòlò edi, swàkù bwà edi òikale òilòòlò dyèndè.

²² Bènesà Mwanèètù wa balùme Moore, Mwanèètù wa bakàjì Moore, nè òikù dyàbò, bàna bààbò balela, bàna bàà bàna bààbò balela. Nzambì, tudi ànu tuKusàkidila bwàbò bòbò. Nè Mwanèètù Lyle, Mwanèètù Brown nè bàna bèètù bònsò bàà—bàà mu èkèleeziyà emu abu, Mwanèètù Don, nè musùmbà mulenga wa bantu ewu, bidimba byònsò mwab’ewu, beena kwitabuuja, tudi ànu tuKusàkidila bwà bwalu bwàbò.

²³ Nènku tudi tulòmba, Taatù wa mu Dyulu, bwà òisangisha dyètù pàmwè kaaba aka ku Disàkidila edi... Ncìfwànyine kwikala Disàkidila dyà òdekeelu òitwikàlàku mwà kutwìlangana pàmwè pa buloba ebu, pa nànkù, Nzambì, tùbwelelakù ku mpùngà ewu nè tuluminyine òibà. Nènku tudi bamanyè nè òibà dikaadi—dikaadi dyènda òiya bikolè, nè tudi baswè bwà byònsò bitùdikù mwà kwenza abi, bìdì mu bukolè bwètù, bwà kwenza mudimu bwà Mukalenge Yesù kumpàlà kwà kulwaYè. Mu mùshindù kampàndà, ndi ndyùmvwa ànu bu nè Yèyè mmutwindile bwà—bwà kujikija mudimu awu. Pa nànkù, tùkwàcishèku, Mukalenge, òilòòlò edi, bu muntu-nkààya, yònsò wa kutùdì, bwà twafwànyina kutàmba kucyùka bwalu bwà bakwàbò, bwà twàya mu misèèsù, anyi mu beena mutumba, nè— nè kubweja bajìmine, bwà bààfwànyina kwikala basùngidiibwe.

²⁴ Bènesaku Dìyì Dyèbè. Dìyì Dyèbè òidì Bulelèlà, Mukalenge, Bulelèlà bwònsò. Pa nànkù tudi tulòmba, bwà nè patùdì tuteeta kudyènzeja bwà kucibula Dyàmpà dyà Mwoyi edi apa, Bulelèlà, kùdì bantu, bwà Nyumà Mwìmpè àlwekù, bwà mubidi mucibùdìibwe ku Kàlvàriyò awu kùvwa mpèkaatù nè

cyà kuwùcibula, nè kuDyàbanya munkaci mwètù cyàkàbìdì, mu bwobùmwe banyùngùlùkile Dîyì. Bwalu tudi tulomba nunku mu Dîna dyà Yesù. Amen.

²⁵ Mpindyewu, bu nwênù mwà kuswà, ndi muswè bwà nùbuululeku pàmwe naanyì. Bààbùngì bàà ku nwênù mbaswèku ànu bwà kulama Mifundu mwaba wùdì—wùdì mwambi ùbala, anyì mutangadiki. Nènku ndi muswè kubalakù ndambù, dilòòlò edi, mu Dutèlònòmà amu, nshapità mwi⁴, kubangila ku mvensà wa 7 too nè ku wa 14. Nènku Mukàndà wà Ebèlù, nshapità wa 14, mvensà wa 25 too nè ku wa 29, mukùmbajilakù. Dutèlònòmà 4.

Bwalu nditunga kaayi didiku ditambe bunène, didi nè Nzambi mutambe kwikala pabwipi naabò, bu mùdì MUKALENGE Nzambi wetù mu bintu byònsò bitùdì tumusòka abi?

Nènku nditunga kaayi didiku ditambe bunène, didi diikale nè mèyi nè mikandu nè bilumbulwidi byakàne bikolè bu mùdì mikenji yònsò eyi, yindì ntèeka kumpalà kwènù leelù ewu eyi?

Wàdimuka wèwè mwine, nè ùlamè musùùkà wèbè nè ntèmà yònsò, bwà kùpù mwoyi bintu bidì mèsù èbè mamòne to, nè bwà kabyùmuku mu mwoyi wèbè matùkù ónsò à mwoyi to: kàdi bilongèshe bânà bèèbè, nè bânà bàà bânà bèèbè;

Nangàangà ditùkù diwàkiimana kumpalà kwà MUKALENGE Nzambi wèbè mu—mu Holèbà, pààkangambilà MUKALENGE nè: Nsangishile cisàmbà pàmwe, nènku nèmàfikishe ku dyumvwa mèyi àanyì, bwà bàayiila bwà kuncina mu matùkù ónsò ikalàbo nè mwoyi pa buloba, nè bwà bààmòna mwà kulongesha bânà bààbò balela.

Nè nwênù kuseemena pabwipi nè kwimana mwînshi mwà mukùnà; nè mukùnà wùlākuka kapyà munkaci mwà dyulu, nè mîdimà, nè mavuba, nè mupimbu, nè mîdimà.

Nènku MUKALENGE kwakula neenù munkaci mwà kapyà: nwênù kutèèleja dîyì dyà mèyi Èndè, kàdi kanwàkamòna difwànangana nànsha òmwè to; nwakatèèleja ànu dîyì adi.

Kàdi yèyè wàkanwàmbila cipungidi cyèndè, cyàkanùtùminàye dîyì bwà nwênù kwenza aci, nànsha mene mèyi matùma dikùmi; nè wàkaáfunda pa bipese bibidì byà mabwe.

Nènku MUKALENGE wàkantùmina dîyì pa dîbà adi bwà kunùlongesha mèyi nè mikandu nè bilumbulwidi, bwà

nwàfwànyina kubyènza mu buloba munùdì nuya bwà kubùpyàna.

26 Nènku mpindyewu mu Mukàndà wà Ebèlù, nshapità wa 14, kubangila ku mvensà wa 25.

Nwàdimuka bwà nwènù kanùbèngi ewu udi wakula awu to. Bwalu pùkalàbo kabààkapànduka bóbò bààkabènga ewu wakaakwila pa buloba awu, mmisangu búngì kaayì yitwàpangila kupànduka, twètù mwà kubenga ewu udi wakwila mu dyulu:

Mwena òyì dyàkanyùkusha buloba musangu awu: kàdì's mpindyewu mmulayè, wàmba nè: Kàdì bwà musangu ewu kàbìdì mèmè nêngìkalè, ncyàkunyùkusha ànu buloba nkàáyabù to, kàdì nè dyulu kàbìdì.

Nènku mwàkù ewu, Musangu ewu kàbìdì...wùdì wùmwija dyumusha dyà...bintu bìdì binyùkushibwa, bu mùdì bintu bìdì byenjùbwe, bwà nè bintu bìdì kabìyì mwà kunyùkushibwa byàmòna mwà kushààla. Kùdì... .

Ki bwà cinyì tudì twakidila bukalenge bùdì kabùyì mwà kunyungishibwa nànsha, twìkalààyi nè ngàsà, kutùdì mwà kukwàcila Nzambì mudimu bikùmbanangana nè kaneemu kààbúngì nè diciìna dyà dífwàna dyà Nzambì:

Bwalu Nzambì wetù ùdì kapyà kàdì kwòsha kàshidisha.

27 Mpindyewu ndi nè tuntu tufùnda ndambù kaaba aka, nè ndambù wa Mifundu mifùnda mwab'ewu, yìndì muswè kwikala nteela mu tusunsa tukesè, mùndì mufwànyine kupèèsha eci mutù mukesè wà cyena-bwalu wà pabwàwù. Nè mikàbà yà mèyì eyi yìdì pabwìpì dībà kanà dyònsò didì muntu kanà yònsò ewu mufwànyine kuyìjinga. Mukalenge Maguire ewu neikalè mukùmbàne mwà—mwà kunùpèèsha bintu ebi. Nènku ndi muswè kwangacila cyena-bwalu, mu cyena-bwalu eci, èyowà's wè, mùshindù ewu nè: *Buloba Bùdì Kàbìdì Munkacì Mwà Kudishinda.*

28 Tuvwa twenda tupweka makèèlèlè, anyì dilòòlò dishààle adi, tupidila mu Memphis, mu Tennessee, kubwelamu bu dībà dipite bikolè mu mapingaja, anyì citùpà cyà dilòòlò. Kàdì's bìvwa bikolè bwà twètù kupicila mu misèèsù, bàna ba—balela nè bantu bàvwa bungwile bikolè be. Ki mèmè kudyàmbidila nè: “Eci ncifwànyine kwikala cinyì?” Ba—bantu kabàvwa bavwàle bu nè bàvwa ku disangisha dyà butèndeleeedi bu mùdì pàmwàpa mwanèètù mwìmpè ewu, Billy Graham anyì Oral Roberts to. Kàdì ncivwa ngèèla meeji nè bàvwa mu distriki adi mu cikondo aci to, mu mishindù yònsò. Nènku bakàjì bàvwa bavwàle mīpanù, nè bàna bakesè bàvwa babànyùngùlùkile, bàvwa ànu bavwàle binsàlàbeetà, nè bikwàbò, binsàlàbeetà byà kuulu nè kwīnshì. Ke mèmè kudikonka nè cīvwa ncinyi, ke ndekeelu wa

byónsò twètù kujandula's. Bàvwa nè—nè dyenza dyà bikàsa dyà Taatù Noël. Kwakadi binunu byàbúngì byàkadi munkaci mwà kubibandila mu misèsù amu, nè bikwàbò. Nènku tuvwa tufùma ku dipicila mu cikondo cyà bwalu bukolè mu Memphis, bwalu ncikondo cyà Noël civwà cilwa.

²⁹ Nènku's Noël nditùkù dinène dyà bungèndààmùshìngà, mu mùshindù wà nè bikaadi byàmba kupita nè Disàkidila diinè, bwalu . . . mu—mu bungèndààmùshìngà, twamb'eku twamb'eku; bwalu bu—bungèndààmùshìngà mbutàmbe kupeta bwenzeji kùdi Noël, bwalu bantu bààbúngì bàdi bàsumba bintu be. Nè bàdi ànu . . . Disàkidila didi ànu dyènda dishààla ku luseka. Nènku tudi tujandula nè, bu mutùdi tumòna Noël munkaci mwà kuseemena kàbìdi emu, mvwa ndyàmbidila nè mbifwànyine kwikala cintu cimpè cyà kwakula pa cyena-bwalu eci, patùdi twenda tuseemena pabwipi nendè apa. Bu mùdibi nè, mu bushùwà bwà bwalu, Noël kèna . . .

³⁰ Tudi tutwà cyanga bwà ditùkù dyà 25 dyà ngondo wa ciswà-munène edi bwà mufikilu wà dilediibwa dyà Kilistò, kàdi, mu bushùwà bwà bwalu, muntu kanà yónsò ewu mmumanyè nè kacivwa mufikilu wà dilediibwa dyà Kilistò to. Aci's civwa mmufikilu wà dilediibwa dyà nzambi-dìbà wa cyena Loomò, bwalu pààkakùdimunà èkèleeziyà mucimà, anyi, kutwadiibwa mu cyena Kàtòlikè, pààkenjiibwàku nsangilu wa ku Nicée. Pamutù pàà kwikalaci “dyà nzambi-dìbà,” bààkacyènta mufikilu wà dilediibwa dyà “Mwànà wa Nzambi.” Apu mpàvwà, dìbà, kubangila ku dyà20 too nè . . . Ndi njinga kwamba nè dyà 21 too nè ku dyà 25, ndyenge bu didi mu dyadi . . . Ndi mupwè nè mwoyi dìnà dinùdi nucibiikila, mu bulelèlè. Ndìbà didibi ànu bu kapwishipwishi kàmwè-anyi-tùbìdi twà dìbà pàdidì dipicila mu citùpà aci. Nènku civwa mmufikilu wà dilediibwa dyà nzambi-dìbà, kàdi bóbò kwangata ànu “Mwànà wa Nzambi” nè kwenza mufikilu wà dilediibwa Dyèndè, bwà kubibwejakaja nè bilèlè byàbò byà cimpàngaanù abi. Nènku kacýènakù nànsha bìshi, nànsha kakesè, mufikilu wà dilediibwa dyà Kilistò to.

³¹ Yèyè kàvwa mwà kulediibwa mu aci cikondo to, bwalu Yudaàya ùdi ànu byà mwomùmwe bu pa—pa . . . mutumbùke pa mushoonyi wà équateur; ànu mùdi mwab'ewu, nènku tudi—tudi tujandula nè, mu Yudaàya, mu cikondo cyà movù wà mashika, mu matùkù 25 à ngondo wa ciswà-munène, yèyè ùdi mu mabungi à nèjè nè mukwàte mashika. Balami bàà mikòòkò kabèena mwà kwikala pa kakùnà apu to, nè kùdi tubingilà twàbúngì twà nè kacivwa mwà kwikala nànkù to.

³² Nènku kàbìdi Yèyè wàkalediibwa bilondeshile bufùki, ànu mùdi bufùki bukwàbò bwónsò ebu, Yèyè—Yèyè kupàtuka mu movù wà bintu bitòloka. Pa ciibidilu pàdi bàna bàà mikòòkò bàlediibwa, mmu movù wà bintu bitòloka; kàdi's Yèyè ùvwa Mwànà wa mùkòòkò. Mpindyewu, ndi ngèèla meejì nè, Yèyè

wàkalediibwa, bwanyì mèmè, mu ngondo wa lwabanya, wa cisanga, anyì mwaba kampàndà lwà muntwamu, mu ntwadijilu wa movù wa bintu bitoloka awu.

³³ Kàdi tudi tusangana nè bàakacyenza ditùkù dyà disùmbisha dyà màshàndwishì. Bantu búngwila mu mìsèèsù, kàdi bàlaabangana makaaya, nè bàkòkangana pa bintu, nè bàdikonka bwà kupèèsha muntu kampàndà ditàpishì, búngì bwà mfrangà yikalàbo mwà kucitùùdila.

³⁴ Ditùkù adi, mvwa mukème. Mvwa mwimàne mu mwaba kampàndà, nè baainàbànzà bàbidì bàvwà munkacì mwà kuyiikila bwà kupèèsha tatwàbò mufiikilu wà dilediibwa... anyì ditàpishì dyà Noël bwà cidimu eci. Ke umwe wabò kwambayè nè: “Mèmè ndi mumupetèle mùlàngì wà maalà à wiskì.” Ke mukwàbò kwambayè nè: “Ndi mumupetèle dibùkì dijimà, anyì carton kàà mfwankà,” anyì cintu kampàndà cikwàbò cyà mùshindù awu. Nènku bàvwa bàmba nè, umwe ùvwa mufile byàbúngì bwà wiskì kutàmba muvwàbò bafile bwà mfwankà.

³⁵ Ke mèmè kudyàmbidila nè: “Piikalà aci ní kî mmùshindù wà kufila kùdì—kùdì... kushintakaja anyì kufila ditàbishì bu civulukilu cyà Yesù Kilistò, Mwànà wa Nzambi!” Ncintu kaayi cyà kupeta naaci lufù’s wè!

³⁶ Nè ndi mmòna buloba bwètù mu dibungama dyà menemene mùdibu mpindyewu emu, bukooyike eku nè eku, kakùyì mùshindù nànsha wùmwe pa buloba bwà bwòbù kwalukilakù mu bwòbò cyàkàbidì to. Mbìmpè twètù kutèya ntèmà, ku citùdì twenza mu matùkù aa. Bwalu tudi, ànu mwaba ewu mu madilu, à bùmwe bwà ku maalù à dibugama dinène, nè—nè bùmwe bwà ku à manène... Kacya katùtukù beelè meeji nè cintu aci ncifwànyine kwenzeka mu Àmèrikè to, kàdi’s ncyòci eci ànu apa mu mishindù yònsò. Nè dilekelela dyètù twètù biine dyà Èvànjeeliyò, mmukunya wònsò kùdì misàndà nè bintàkanyì bu nànkù, nènku nebitambe kubiipa. Kakwèna mpatà nànsha yà kàna to, mu meeji àanyì, bwà nè nebiikalè nè cyà kutùngunuka nè kwenda kubiipa.

³⁷ Kàdi tudi tujandula nè, mu Noël ewu, bwà kufika ku cyena-bwalu aci, nè Noël ewu ùdi ùsangana buloba ànu mwàkadibi kùkaadi bidimu binunu bìbidì amu, pààkalwà Yesù. Kî mmushintùlùke bikolè menemene to kubangila ànu piinè apu. Bwalu, eci, Noël awu wàkasangana buloba munkacì mwà kudishinda, nè bùvwa munkacì mwà kukèba Maasiyà bwà kubwàmbulwisha bwà kubùlama pàmwè. Nènku—nènku ke mùshindù wùdibi nànkù leelù ewu, tudi twenza cintu cimwècimwè aci. *Buloba Bùdi Kàbidì Munkacì Mwà Kudishinda.*

³⁸ Mpindyewu, aci kî ng’ànù mu Àmèrikè emu nkààyaamù to, kàdi aci’s cidi mu buloba bujimà, mwaba wònsò wùyaayà

awu; bukwantèndeleeu, beena cidiidi, mu bintu byònsò, mu—mu beena maalu à bukàlàngà. Cidi—cidi, kacicyènakù ànu kàbidi to, cidi ànu. . .Nsòmbelu wa bukàlàngà ùdi ànu munkaci mwà bantu bimpè, kàbidi, nè aci's ncikolè be bwà kucipeta. Bidi—bidi bundù. Nè cidiidi nè bikwàbò byònsò mbinyangùke, mu mùshindù wà nè cintu cijimà cidi cisaama cyùle nè mpùtà yà tufinà, kuumukila ku mutù too nè ku makàsà, buloba bujimà. Ndongolwelu wetù wa cidiidi, ndongolwelu wetù wa ntèndeleeu, ndongolwelu wetù wa maalu à bukàlàngà, byònsò bitùdi naabi, mbiyè! Kòkù, kakwènakù ànu mùshindù wà kucilama pàmwè to. Yèyè, kwèndè nkumanè kujika! Kùdi. . . Tukàadi ku ndekee ku njila. Ke cyònsò cidiku ncyôci aci.

³⁹ Twètù, ndi mumanyè nè tudi baakùle pa bwalu abu kùkaadi ntàntà mule, kàdi dimwè dyà ku matùkù àdi panshi aa neciikale bwalu bumana kwakula bujikè, neciikalè cintu cyà bwalu-bulonda, nènku netùdisangànè pambèlu twètù katùyi batàngile dībà edi to.

⁴⁰ Ndi ndikonka, bu twètù aba mu Noël ewu, bu Nzambi mwà kuMutùma cyàkàbidi mwàkenzàYe kale wàwa kùkaadi bidimu binunu bìbidi amu, bu Yèyè mwà kutùtùminaYe mu cidimu cyà 1964, ndi ndikonka ní katwènakù bafwànyine kwenza Nendè mwàkenzàbo musangu awu amu anyi? Ndi ndikonka ànu nè Dilwa Dyèndè ní ndifwànyine kwikalakù ditàmbe, ní bààMwakidila bilenga, mu—mu—mu maalu à cidiidi anyi mu bukwantèndeleeu, kutàmbe mwàkadiYe musangu awu amu? Ndi ànu ndikonka ní tudiku mu mùshindù wà kuMwakidila, mutàmbe mwàkadiYe musangu awu amu? Kàdi tudi bamanyè nè Yèyè wàkabèngiibwa musangu awu.

⁴¹ Citùdi bafwànyine kuMwenzela ncinyi bu Yèyè mwà kulwa? Pàmwàpa bukwantèndeleeu, bündi mujaalàmijilepù eci abu, mbufwànyine kuMwenzela mwàkamwenzelàbù musangu awu amu's. Bàvwa mwà kuMupoopela pa nkùrusè bu bôbò mwà kukumbana, (kí mbashintùlùke to), bwà kabingilà kàmwèkàmwè kàakacyènzèlābo musangu mukwàbò awu aku.

⁴² Bàakacyènza bwà cinyi, bàakapoopela pa nkùrusè Ewu mene uvwàbò bàsambidila bwà kulwa pa buloba awu, bwà kubàsùngila, bwà kubàpàtula mu cimvundù cinène aci? Bàakapoopela pa nkùrusè ditèkemena dimwèpelè dīvwbò naadi's. Bwà cinyi? Bàakacyènza bwà cinyi? Bwalu, pàakandamunà Nzambi disambila dyàbò, Wàkadyàndamuna mu mùshindù wàkadibo kabàyi batèkèmène nè nedyàndamunyiibwè to. PàakalwàYe, Yèyè kàakalwakù ku mmwènenenu wa tèlòlōjī wabò awu to.

⁴³ Nènku bu Yèyè mwà kulwa cyàkàbidi, leelù ewu, Ûvwa mwà kulwa mùshindù wùmwèwùmwè awu; pambèlu pa mwenya wà maalu à pa buloba anyi tèlòlōjī wa maèkèleeziyà, nè mùshindù wùvwàbo bafwànyine kuMwelela meeji. Yèyè ùtu ùlwa misangu

yônsò, bu Nzambi . . . Bantu, pàdibo bàpeta lutàtu, nè bàsambila, dîbà adi Nzambi ùdi ùbàpéesha cidîbo bàsambidila aci, kàdi Ûdi ùcîfila mu mùshindù wùdì mwîmpè bwàbò awu. Kàdi's bààkaCibenga, bwalu Kacyàkalwa mu mùshindù wùvwabo bèela meeji nè Cìvwa nè cyàkulwa. Bààkabènga Dîyi dilaaba dyà Nzambi, pèndè's Yêyè ke Dîyi.

⁴⁴ Mpindyewu, Nzambi, mu bikondo byônsò, misangu yônsò, pààkabangàYe: “PààkaakulàYe Dîyi Dyèndè mu bikondo byà kale mu bapròfetà, mu matùkù à ndekeelu aa mmwakwile ku Yesù Kilistò, Mwan'Èndè,” tudi tusangana nè cyônsò cyà ku bipròfetà abi cìvwa nè cyà kukùmbanganana nè cikondo kampàndà. Ànu bu Mfùmù Nebùkàndànèesà pààkapètaye cilòòtà eci, nè bàà Bisàmbà byà bendè kuumukila ku mutù too nè ku makàsà, nè Danyèlè wàkafila dyumvwija dyà cilòòtà eci; cìvwa ci—cìpròfetà kùdì bàà pa buloba bujimà, kashidi, kasumbù kònsò kàà Bukalenge bwà bàà Bisàmbà byà bendè, mùvwàbo mwà kuumuka ku mutù kuya ku makàsà. Nè bapròfetà bàtu misangu yônsò ànu bààkula Méyi àvwà nè cyà kwenzeka mu cikondo nè cikondo cyônsò. Nènku pàdì Nzambi . . .

⁴⁵ Bantu bàpeta lutàtu, nè Nzambi ùbàndamuna. Ûdi ùbàtùmina mupròfetà mulaaba anyi mùsànjeelà wa mùshindù kampàndà, bwalu Yêyè kèna mwà kwalukila pa Dîyi Dyèndè didiYe mukòse bwà cikondo aci to. Kàdi, cidìYe wènzà, Ûdi ùtùma mùsànjeelà bwà kwenza citùpà cyà Dîyi aci nè mwoyi bwà cikondo aci. Ke citùci cyènzà misangu yônsò, nwamònu's. Wàkenza Dîyi Dyèndè ku cibangidilu. Ùvwa mumanyè ndekeelu kacya ku cibangidilu. Wàkaakula Dîyi Dyèndè. Nènku mu cikondo cyônsò, pàdibo bàpeta lutàtu, bàvwa mwà . . . bàvwa mwà kusambila, nè Nzambi ùvwa mwà kutùma mwela maanyi. Nènku mulaaba maanyi awu kakùyi mpatà to ùvwa mufwànyine kwenza bwà mulayi wà cikondo aci awu, wùvwà mudyanjila kwamba bwà cikondo aci awu, kwikalawu nè mwoyi. Nènku ke cidìYe wènzà dîbà dyônsò. Nzambi kàtu ùshintululakù ndongamu Wendè to. Mpindyewu, kacya katùtùkù bânji kupeta Nzambi ùshintuluka to.

⁴⁶ Nzambi wàkacijaadika musangu kampàndà, mùvwàYe mwà kusungila muntu, cìvwa mmu budimi bwà Edènà, mwînshì mwà mashi meela panshì. Tudi bateetè ndongolwelu mukwàbò yônsò, kuumukila ku mabèji à mfigi too nè ku dilonga dyà tùlaasà, dilonga dyà nsòmbelu, mângumba à ndongolwelu, nè bikwàbò, nè katùpà kònsò kààci cyà—cyàkabèngilbwa; kàdi kacyàkakùmbanakù to, kacyàdyàkukùmbanakù to. Nzambi neàtwilanganè nè muntu ànu mwînshì mwà Mashi meela panshì, nè ke mwaba wùmwèpelè wàtwilanganàYe nendè, bwalu aci ke cìvwa dipàngadika Dyèndè dyà kumpàlà. Yêyè kàadyàkutwilanganakù nè muntu mwînshì mwà ndongolwelu wa bukàlàngà to. Yêyè kàadyàkucyènzakù nànsha kakesè, mùshindù nànsha wùmwèpelè pa buloba to! Alùkilaayi ànu

buludi ku Njila wa Nzambi, ke cyàkambàYe dyàmbedi ncyôci aci. Nè Yêyè kèna nè mikàlù to, kèna mwà kushintuluka to, nè Ùdi misangu yônsò ànu umwèumwè awu. Ke mwaba wùdiYe ùtwilangana nè muntu, nè ànu mwaba awu nkààyamù. Ke bwà cinyi tudi tupanga kwenza bwobùmwe leelù ewu, ke bwà cinyi èkèleeziyà mmutàpùlùke bikolè, bwalu yônsò wa ku yôyi mmutàpùlùke mu ndongolwelu kampàndà, nè, pàdìbo bènza nànkù, dībà adi Nzambi ùdi ùbàbènga, ànu mwaba awu. Yêyè mmuswè bwà twètù kutwilangana mwînshì mwà Mashi, mutùdi nè bintu byônsò bitèeka pàmwe, kwînshi kwà Nkùrusè aku. Kiipàcilà kàmwèpelè kàà Nzambi bwà kucyènza! Nzambi ùtu misangu yônsò ànu ùtùma Dìyi Dyèndè.

⁴⁷ Nènku tudi tusangana, leelù ewu nè, buloba leelù ewu bùdi ànu mwàkadibu mu ditùkù adi amu; bùdisangana, ndongolwelu wabù wa cidìidi, nè bikwàbò, byônsò munkaci mwà kudishinda, nè bindile maasiyà kampàndà wíkala mwà kubùlamakaja pàmwe.

⁴⁸ Mpindyewu, mwàkù *maasiyà* mbwena kwamba nè “mwela maanyì,” cintu kampàndà cilaaba maanyì. Nzambi! *Eci* ndibuulula dyà Yesù Kilistò, mukàndà mujimà wàkatwibwa citampì nè Bitampì Mwandamutekète byà dibuulula dyà Yesù Kilistò. Yesù Kilistò ùvwa mu Genèsè; Yesù Kilistò ùvwa munkaci mwà Mukàndà. Yesù Kilistò ùvwa mu—mu Ekèsòòdè nè mu Genèsè, nè Yêyè ùvwa munkaci mwà Mukàndà nè Ùvwa mu—mu Dipungila Dipyadìpyà, nè mu Bwàkabuulwibwà nè too nè ku ndekeelu: “umwèumwè awu makèèlèlè, leelù, too nè kashidi.” Byônsò abi’s n’Nzambi!

⁴⁹ “Ku cibangidilu kwàkadi Dìyi, nè Dìyi dyàkadi nè Nzambi, nè Dìyi dyàkadi Nzambi. Nè Dìyi dyàkavwijiibwa mubidi nè dyàkasòmbela munkaci mwètù.”

⁵⁰ “Nzambi mu bikondo byà kale nè mu mìshindù mishilèshilàngàne wàkaakwila nè baataatù kùdi bapròfetà.” Pààkalwà Dìyi dyà Mukalenge kùdi bapròfetà, nè ànu bôbò nkààyabò, bwalu bàvwa balaabiibwe nè Dìyi, bàvwa nè bukenji bwà kuumvwija Dìyi. Nè Nzambi ùvwa ùkwàcila mudimu ku bôbò, ùjaadika nè Dìyi divwa dilelèlè. “Piikalàbi nè Mèmè. . . kôkò muntu munkaci mwènù mwikàle wa nyumà, anyi mupròfetà, Mèmè Mukalenge neàDimanyishè kùdiye. Kàdi cidìye wàmba cyôci cyenzèke, dībà adi nùmutèèlèjaayi. Cyôci kaciyi cyenzèke to, kanùmutèèleji to.” Aci kì ncipite dilukakaja dyà lungènyi dimpè to, bwà muntu kanà yônsò ewu.

⁵¹ Mpindyewu tudi tudisangana kaaba aka, mu matùkù à ndekeelu mpindyewu, patùdi bindile Dilwa dyà Mukalenge cyàkàbidi apa.

⁵² Nudi bavùlùke bìmpè muyiishi mununu wa ba-Baptistes wàkambàtiiza mu Dìna dyà Yesù Kilistò awu, pàncìvwà ànu mwànà mutekète. Nènku ùvwa nè ciibidilu cyà kukòkangana

naanyi pa cyena-bwalu eci, bwà Yone Mubàtiji. Yèyè nè: “Mwanèètù Billy,” yèyè nè: “pàvwà Yone... Pàākambàye nè: ‘Itàbà bwà bìikale nànkù,’ nè pashìishe yèyè kuMwitabila.” Yèyè nè: “Pashìishe Yone, wàkabàtiiza... Yèsù wàkabàtiiza Yone, bwalu tudì bamanyè nè Yone kacya kàvwakù mwanji kubàtijiibwa to, kàdi nànsha nànkù ùvwa ùyiisha dibàtiiza.” Èè, aci’s cìvwa misangu yònsò ànu cyenze bu cìdi cìnjànguluja, ndambu’s.

⁵³ Pashìishe mwab’ewu ànu matùkù mashààle aa, cyàkabuuludiibwa kùndì, mu mùshindù ewu, nè bààkatwilangana kuntwaku mu dijiba amu, mu ciinà cyà màyi aci, baamisànjeelà bàbìdì bàà batàmbe bunène bàkaadikù bàà pa buloba ebu bamòne: mu—muntu uvwa kumutù kwà bapròfetà bònsò, uvwa Yone awu, “kacya kakùvwakù muntu nànsha umwe mulela kùdì mukàji, munène bu yèyè to”; nènku kùvwa Nzambì, Yèyè nkààyendè, mumwènèshìibwe mu mubidi wà musunya. Nènku vùlukàayi, nè Bible ùdi ùtwàmbila nè: “Dìyi dyà Mukalenge ditù dila kùdì mupròfetà.” Nènku pàākavwijiibwà Dìyi mubidi; ke mupròfetà ewu mwimàne mu màyi. Nènku Dìyi nè mupròfetà bààkadisanga, bààkamanyangana ewu nè mukwendè! Cyà bushùwà. Dìyi Dyòdì diinè, divwijiibwe mubidi, Mwànà wa Nzambì mwandàmùke mubidi, dyàkalwa kùdì mupròfetà, mu màyi.

⁵⁴ Mupròfetà wàkamba nè: “Bìdi bìkèngela bwà mèmè kubàtijiibwa kùdì Wèwè, kàdi bwà cinyi Wèwè udi ulwa kùndì?”

⁵⁵ Yèyè nè: “Itàbà bìikale nànkù, bwalu mbikùmbane mùshindù ewu bwà twètù kukùmbaja bwakàne bwònsò.”

⁵⁶ Mònaayi’s! Yone, bu mùvwàye mupròfetà, ùvwa mumanyè nè Yèyè nguvwa Mulàmbù awu. Nè mulàmbù wùdì nè cyà kusukudiibwa kumpàlà kwà kufidiibwawù bu mulàmbù. Nènku ke bwà cinyi byàkakèngela bwà kubàtijiibwaYè.

⁵⁷ Kaa, leelù ewu, mbitùkùmbànyine, bwà twètù kukùmbaja bwakàne bwònsò bwà ditùkù dyètù. Dìbà dyàkùmbanyi. Bible ùdi ùtwàmbila cìdì nè cyà kwenzeka mu ditùkù edi. Tudi bamanyè cìdì Bible wàmba nè necyènzekè mu ditùkù edi. Abu mbutùtàngile bwà kushààla bakwàte Nzambi too nè pàdi maalu aa ènzeka. Ke dìbà ndyòdì adi! Sambilaayi bwà mwela maanyi wíkala mwà kutùpèesha disùngidiibwa ditùdì bindile adi, bwalu Nzambì ngudi mucilayè.

⁵⁸ Bààkabènga Dìyi dilaaba dyà Nzambì dìbà adi, nànkù awu cyàkapòna panshì, cyàkadishinda. Nè kàbìdì tudì tusangana nè, mu cikondo eci, cìdì kàbìdì munkaci mwà kudishinda. Ndi njandula, mùngàmbì nè, cìdìdì cyètù ncibolè, nsòmbelu wetù wa èkèleeziyà mmunyangùke. Cìdì cyenzèke ncinyi? Cìdì cicyènzè ncyòci eci; dìbà dyònsò dyùdì uya kule naaci, dìbà kanà dyònsò, kule nè ndongamu wa Nzambì, neupetè dibola. Kacyèna mwà

kwimana to. Díyì dyà Nzambì kaditu dipangila to, nè kakwèna cintu cikwàbò nànsha cimwè cyàngata kaaba kààDì to, nànsha kakesè.

⁵⁹ Ndongolwelu wetù wa dilonga dyà tùlaasà, ndongolwelu wetù wa cyena-màngumba, mmwangàte kaaba kàà Nyumà Mwímpè bwà kulombola mu èkèleeziyà. Dilongeshiibwa dyètù dinène menemene dyà bambi nè bikwàbò mbyangàte kaaba kàà—kàà masangisha à milòmbò à bufùkù bujimà, nènku mùshindù wà kale wutùvwà tukafika kùdì Nzambì awu's. Mpindyewu, pamutù pàà kwikala nè bayiishi, tudi nè benji bàà miyiiki, bantu mbamanyè Díyì ànu bímpè menemene, bàdi mwà kusòmba mwaba awu nè kuDitèeka pàmwè mu mùshindù wà bikèmesha nè mùdibo bàcyèenza. Mbamanyè byamù bilamakaja, kàdi aci kî m'Bukolè bwendeshi nànsha. Twètù tudi baswè Bukolè bwendeshi abu. Nànsha byamù bilamakaja biikàle binganyi; ndi muswè kumanya Bukolè bwendeshi. Ncinyi cidiBu bwèenza?

⁶⁰ Ncyèna mumanyè mùshindù wùdì kàshinyi aku kànyeema lùbilu kuntwaku to. Kàdi nè pistons nè cylindres, kàdi ncyèna mumanyè búngì bwà bukòlè bùdiku kàkwàta naabù mudimu to. Cintu cimwèpelè cìndì mumanyè m'bukolè bwendeshi, bùdì bùkàpàtula nè bùkèndesha.

⁶¹ Ke citùdì bamanyè ncyôci aci, Nzambì wàkafila mulayi nè: “Mèmè nèngiìcikijè Nyumà Wanyì pa mubidi wònsò, bàna bèenù balela bàà balùme nè bàà bakàjì nebàmbè bipròfetà.” Mmunyi mwikalàYe mwà kucyèenza? Ncyèna mwà kunwàmbila to. Ndi muswè ànu kumanya Bukolè bwendeshi bwà ndongolwelu wa Nzambì abu. Ke cintu cyà mushinga ncyôci aci.

⁶² Leelù ewu tudi balonge byamu bilamakaja too nè mùdì byònsò bilwè ànu byamu pa byòbì. Kàdyèndelandelà nkìmpè ku cinyi kakùyì cintu kampàndà munda mwàkù bwà kukèndesha? Makènkè mmímpè ku cinyi piikalà—piikalà... anyi ndungilu, kòkù kakùyì nzembu nànsha mikesè munda mwàbù? Nwamònu's, tudi nè byamu bilamakaja byònsò, tudi nè bilongelu nè balongeshanganyi, nè bikwàbò, bìdì mwà kulongesha muntu, mu mùshindù wà nè ùdì mwà kwimana mu cyambilu nè mishindù yà bwena ayi mu mùshindù wà mwikàle mwakudi wa dipòkò. Aci kacýèna ànu citwàla Bukolè bwà Nzambì to. Bukolè bwà Nzambì bùvwà kale wàwa bwà èkèleeziyà abu bùdì penyi? Dibènesha dyà mpenta dìvwà pa ciibidilu dipòngoloka mu maèkèleeziyà adi didi penyi? Ke bwà cinyi buloba bwètù bùdì munkaci mwà kudishinda, bwalu tudi buumùke ku mèyi-makùlù malelèlè à Nzambì, nè balongeshe bantu tulaasà mu ndongolwelu nè bikwàbò. Nènku ke cidi citùbweje mu ngiikàdilù utùdì leelù ewu ncyôci aci. Ndi ngiitabuuja nè ke bwà cinyi buloba bwètù bùdì munkaci mwà kudishinda.

⁶³ Myandà yà bikùmà eyi yìdi pa buloba kacya ku matùkù à Noà. Tudi tujandula nè pàdì Nzambì...wàkadì nè Noà, mupròfetà wa bwakàne, ùpàtuka nè mukenji wèndè, kùvwa mwandà wà nsòmbelu wa masandi mu ditùkù adi, mùdì Bible mwambè nè: “Bàdya, bānwa, bàsèlangana, bàsèleshangana.” Tudi tujandula nè, didyà dipicisha nè nsòmbelu wa masandi, nè bikwàbò, byàkenzeka mu ditùkù adi. Ke pashìishe buloba kudishindabò bwalu bantu bààkabènga mukenji wà Nzambì, bwà ditùkù adi. Noà ùvwa mupròfetà mulaaba maanyi kùdì Nzambì, mutuma kùdì Nzambì, mwikale nè mukenji wa kùdì Nzambì, nè yèyè wàkapèesha bantu didimwija kumpàlà kwà cilumbulwidi kulwaci. Ki kukenyabò ku mènù nè kusekabò, nè kucyelulwilabò, nè kusekabò, ke ndongolwelu mujimà wa buloba kupònayè panshì, mu ditùkù adi, nènkù bààkiinyijibwa mwìnshì mwà mbù. Ncyà bushùwà. Bwà cinyi? Bààkabènga mukenji wà dībà.

⁶⁴ Tudi tujandula nè cintu cìmwècìmwè aci cyàkenzeka mu Èjiipitù, pààkalombolà Mòsà bānà bàà Izalèèlà apu. Ndongolwelu mujimà wa cyena Èjiipitù ùkaavwa munyangùke. Nènkù tudi tusangana mpindyewu nè cyàkenzeka cyàkàbìdì, pààkatùmà Nzambì mùsànjeelà mulaaba kuntwaku bwà Dìyì Dyèndè. Cìvwa mbwà kuuja Dìyì Dyèndè.

Wèwè udi wamba nè: “Cìvwa mbwà kuuja Dìyì Dyèndè anyi?”

⁶⁵ Wàkambila Abraham nè ke cìvwa Ye mwà kwenza menemene aci's. Nènkù bivwa bikèngela bwà kulwakù muntu kampàndà mu cyalu, pa dībà adi, bwà kuvwija Dìyì adi nè mwoyi ànu kumpàlà kwàbò mene. Nzambì ùvwa mutùme Mòsà Wèndè kuntwaku, nè, cintu ciinè cyàkalayà Ye bwà kwenza aci, wàkacyènza, bwalu yèyè nguvwa Dìyì dilaaba bwà dībà adi. Wàkamba nè cìvwa mwà kulumbulwisha bàà pa buloba's. Dìyì dyà Nzambì dyàkamba nè: “Nèndumbulwishè ditùnga adi nè maalù manène à kukèma nè à bukolè nè bimanyinu.”

⁶⁶ Ke muntu awu mwimàne mwaba awu, ànu muntu wetù wa pàtupù ewu bu wèwè anyi mèmè kùnu, mwikale nè Dìyì dyà kùdì Nzambì, nè kupàtuka kuntwaku kàdì kwakula nè bufùki kumwènekabò. Yèyè nè: “Lèkèlà...” Kwambulayè lusenga, nè kwamba nè: “Nkùpà yipàtukè mu buloba.” Nènkù Dìyì dyà Nzambì, mukana mwà mupròfetà awu, mùvwàbì nè divwa ànu mu dībà divwàdì nè cyà kwikala, nkùpà kubwikila buloba bujimà. Wàkabwikila buloba nè ndimbà, nè nkùsù. Wàkabùbwikidija nè mìshindù yònsò yà—yà cikupi nè bikwàbò. Bwalu, Nzambì wàkenza mulayì, nè dībà divwakù bwà wòwò kulaabiibwa, Dìyì dilaaba bwà dībà didìbò nè mwoyi adi.

⁶⁷ Ke cìdì citùkèngelà leelù ewu, kì nkwalukila mu ndongolwelu kampàndà wa sèminère to, kàdì Dìyì dilaaba bwà dībà ditùdimu nè mwoyi edi, bwà kutwàla cyàkàbìdì Yesù

Kilistò kùdì bàà pa buloba: “Umwèumwè awu makèèlèlè, leelù, too nè kashidi.” Kùdì—kùdì ndongamu mutèèka mwaba awu bwà ditùkù edi, mulayi wà Nzambi. Nè mùshindù wùmwèpelè wutwikalàku bakùmbàne bwà kwikala mu bulongame, ngwà kulekela Dîyî adi dilaabiibwa maanyî. Ncyà bushùwà. Cîtu misangu yònsò ànu cyezenèke. Èyowà.

⁶⁸ Tudi tusangana dikooyika dinène dyà maalu à nsòmbelu mu matùkù à Nebùkàndànèèsà. Yèyè ùvwa nè muntu mulaaba. Pààkalwà cianza cívwa cífunda ku cimanu aci, Yèyè's ùvwa nè muntu uvwa mwà kucibala.

⁶⁹ Matùkù à Lotà nè Sodomà, tudi tusangana kàbìdì buloba munkaci mwà kudishinda. Nzambi wàkasùngila cívwa mwà kusùngidiibwa, kucipàtulamù.

⁷⁰ Mu matùkù à Yesù Kilistò, tudi tujandula nè ndongolwelu mikwàtakaja kùdì bantu ayi yívwa mitèèke buloba bujimà mu ngiikàdilù wa mùshindù awu, nè cidiidì cyàbò cyà ditùkù adi, mu mùshindù wà nè, bôbò, buloba bujimà bùvwa munkaci mwà kudishinda, ku Noël wa kumpàlà awu.

⁷¹ Mpindyewu tudi bènzè cintu cimwècimwè aci, balùkile buludi nè banyangàkàje Dîyî dyà Nzambi, ku ntèndeleeleu wa ndongolwelu, mu mùshindù wà nè tudi bacisangane cidishinde. Ncinyî cyà ku ndongolwelu ayi citùdì mwà kweyemena mpindyewu's? Ndongolwelu kaayi utùdiku mwà kuyamù, wa ba-Méthodistes anyi, wa ba-Baptistes anyi, wa ba-Presbytériens, anyi ndongolwelu wa beena Mpenta? Kakwèna cintu nànsha cimwè citùdì mwà kwenza to ànu kwalukila ku Dîyî dilaaba dyà mulayi bwà dibà edi. Ndongolwelu eyi's mmitekètàngàne, kayiyi nshindameenu. Yôyi, yidi, yidi ndongolwelu mikwàtakaja kùdì bantu, nè kayààkunùsùngila to. Munda mwàyi kamwèna Mwoyi to. Mwoyi wùdi ànu mu Dîyî dyà Nzambi. Dyôdi ke Mwoyi. Yèyè ngudi mwàmbè nànkù.

⁷² Nè mùshindù wàkadibi musangu awu, pàvwàbo bàsambila apu, bantu bàdi bàdisangana ku ndekeelu kwà lwendu lwàbò, anyi bashiikile, ànu mwàkadibi mu matùkù à Noà nè matùkù à Mòsà, nè bikwàbò. Pàdibo bàdisangana, nè kabèèna kàbìdì nè kwà kuya to, dibà adi ke kubangabò kusambila. Nènku pàdibo bàbanga kusambila, Nzambi ùdi misangu yònsò wàndamuna. Dibà adi Yesù wàkalediibwa.

⁷³ Buloba mu ciine cikondo aci, ànu bu mungàmbi nè, bùvwa munkaci mwà kudishinda. Ditùngà nè ditùngà dyònsò òvwa dikèba maasiyà kampàndà, ànu mutùdì leelù ewu emu. Loomò ùvwa munkaci mwà kukeba mwena meeji matwè munène kampàndà, mwabilaayi kampàndà munène uvwa nè màyelè ònsò à bùsàlaayi awu, bwà wàmòna mwà kuya kuntwaku nè kwipatangana nè beena Ngelikà nè bakwàbò bàà pa buloba abu. Grèce ùvwa ùkèba cintu cimwècimwè aci, muntu kampàndà

uvwa mwà kubàmbila mùshindù wùvwàbo mwà kucimuna bakwàbò bàà pa buloba.

⁷⁴ Batèndeleeedi bàà cyena Yuudà bàà mu ditùkù adi bàvwa bindile kalààlà kàà mäsàlaayi. Bààkeela meeji nè kùvwa mwà kulwa Maasiyà ùfùmina mu Dyulu, mwikàle nè dikombo dinène dyà cyamù mu byanza byèndè, nè Ùvwa mwà kucimuna Loomò, kubàdyatakaja ku makàsà kubìimansha mu mbù. Nè bònsò abu, bàvwa bindile muntu wa mùshindù awu. Bàvwa bàjinga kalààlà kàà mäsàlaayi.

⁷⁵ Ànu mùdi musùmbà mujimà wà màngumba ètù à leelù ewu aa, màngumba ètù àdi àkèba muntu wa mutàmbe bakwàbò. Ditùnga dyètù didi dikèba muntu wa mutàmbe bakwàbò. Russie ùdi ùkèba muntu wa mutàmbe bakwàbò. Bantu bàà ku esètè bàkèba wabò. O.N.U. ùdi wènda ùkèbangana nè wèndè. Èkèleeziyà yìdi yìkèba wàbò. Kàdi ngwa mùshindù kaayi udibò bàkèba awu's?

⁷⁶ Russie ùdi ùkèba maasiyà udi mulaaba nè—nè bwongò udi mumanyè mùshindù wà kubàkòòkeshila cibwàshìbwàshì, kutàmba bakwàbò bònsò ku diya dyà ku ngondo. Mbaswè kukòòkesha buloba. Aci's cidi ànu . . .

⁷⁷ Kàdi, nudi numòna's, pàdìbo bàlòmba bintu ebi, nè bàlòmba cikampàndà, kabèèna bàlòmba mùvwà Yesù mwàmbè to. Tudi tuteeta kuvwija Nzambi bu—bu mwànà wa kutùma nè njàntà nè: “Mukalenge, Wèwè ngenzèlè *cikampàndà* eci! Nè Wèwè ngenzèlè *cikampàndà*! Nènku Wènzè *cikansanga*,” ùMwambilè cyà dyenza.

⁷⁸ Yesù wàkamba nè: “Panùdì nusambila, nùsambilàayi mùshindù ewu nè: “Taatu wetù Udi mu Dyulu, Dìna Dyèbè djiidiibwè. Bukalenge Bwèbè bulwe. Diswa dyèbè dyènzekè.” Nganyì, jandùlaayibi mwaba utùdi twenza nànkù awu's? Tudi misangu yònsò ànu tuswa bwà Mukalenge kutùnyeemena mbilu, anyì kutwènzela cintu kampàndà. Kàdi patùdi baswè kwamba nè: “Diswa Dyèbè dyènzekè,” tudilàmbula twètù biinè kùdiYe, tulàmbula njila yètù kùdiYe. Cyònsò citùdi aci, tùcilàmbùlaayi kùdiYe. Apu mpiikalà Nzambi mwà kutentemuka, paùdi muswè bwà kuMulekela ùkwàta mudimu pa wèwè, kî ngwèwè ukwàcila mudimu pa Yèyè nànsa.

⁷⁹ Yèyè àkwambilè, kî ngwèwè uMwambila nè ùcikònyangaja to. “Lwàkù ku ndongolwelu wetù, Éyì Mukalenge Nzambi, tùvwijèku twètù bònsò ba-Méthodistes, twètù bònsò beena Mpenta, tùkookeshè bakwàbò bònsò. Tudi baswè muntu kampàndà wa meeji matwè, twètù beena Mpenta, twètù ba-Méthodistes nè ba-Baptistes.” Tudi nè maasèminère, twibaka yà minène menemene ayi, twamba nè: “Ndekeelu wa—wa cikondo ùkaadi pabwipi, Dilwa dyà Mukalenge,” baditwe mu kwibaka sèminère yà yiyiila miliyò yà ndola, nè bikwàbò. Kuteeta kwenza cinyi? Kutùpetelakù maasiyà kampàndà. Ncyà bushùwà.

⁸⁰ Kàdi Mukalenge àjuulèbi cintu kampàndà mwaba kampàndà, dínà dīgumba dyònsò didi didikèbela wadì wa mùshindù wùm>wùm>wùm awu. Aci's mmwòmò menemene. Jandùlaayi's. Tàngilàayi nùmonè pààkatuutà dyondopa dyà kùdì Nzambi, mbúngì kaayi bwà bondopi bàà kùdì Nzambi bààkajuuka? Muntu nè muntu ùvwa nè cyà kwikala mwondopi wa kùdì Nzambi.

⁸¹ Kwàkapàtuka ànu Mòsà umwèpelè mu matùkù awu. Kùvwa Eliyà umwèpelè, Elìshà umwèpelè, Yeshàayi umwèpelè, nè bikwàbò.

⁸² Mpindyewu tudi tujandula nè bàà pa buloba mbaswè maasiyà wabò sungasunga. Russie mmuswè wendè, nè États-Unis mmuswè wendè, bukwantèndeleeleu mbuswè wabò. Muntu yònsò mmuswè wendè maasiyà, kàdi mbamuswè mu mùshindù wùdìbo—wùdìbo mwà kumukòntonona. Mbaswè kwikala nè bukòntononyi pa maasiyà ewu. Kaa, bushùwà's. Èyowà, bôbò, bu nè bàvwakù mwà kwikala nendè's. Bu Nzambi mwà kumutùma mu ngumvwilù wabò sungasunga, bàvwa cyà bushùwà mwà kumwitaba. Kàdi nudi numòna's, díbà adi, Nzambi ùvwa mumanyè majinga àbò. Yèyè—Yèyè kî mmulayè bwà kutùtùmina bitùdì baswè nè bitùdì tulòmba to, kàdi bìdì bitùkèngela.

⁸³ Bàvwa baswè kalààlà kàà māsàlaayi; bààkapeta Mwànà wa mu dibòkò. Nwamònu's, ke civwà cibàkèngela ncyòci aci. Bìvwa bibàkèngela mwànà wa mu dibòkò (cinyi?) bwà kubàpwekesha milongo, bwà kubàpwekesha.

⁸⁴ S'ke cìdì cìkèngela èkèleeziyà wa mudyènzela leelù ewu, kudìpwekeshayè cyàkàbìdì. Mbikafikè mu mùshindù wà nè, kakwèna ditonda to nè kakwèna dinanga munkaci mwà bantu to. Mbimwèke ànu bu nè bìdì munkaci mwà kufwà ku ditùkù nè ku ditùkù. Èkèleeziyà ùdì munkaci mwà kukwàcika mashika. Myaba yònsò, nudi nusangana nè ditàbuluja ndijikè, nè nudi nusangana dikwàcika dyà mashikà dyà kacya. Bìdì bitùkèngela didìpwekesha. Nè tudi . . .

⁸⁵ Bààkalòmba kalààlà kàà māsàlaayi; kàdi bààkapeta Mwànà wa mùkòòkò. Bwà cinyi? Mbwena kwamba nè, Nzambi ùvwa mumanyè civwà cibàkèngela. Ke civwà cibàkèngela aci's. Bàvwa dijinga nè Musùngidi. Bààkeela meeji nè bàvwa basùngidiibwe, kàdi Nzambi ùvwa mumanyè nè kabàvwa basùngidiibwe to.

⁸⁶ Nènkù ke cìdì cìkèngela bwà bàà pa buloba leelù ewu aci, cyàkàbìdì, m'Musùngidi, Musùngidi wa ngiikàdìlù ewu, cintu kampàndà cìdì mwà kubùlama pàm>wè. Kî ndongolwelu kampàndà wa tùlaasà tulonga to, ndongolwelu kampàndà wa mulamakaja, anyi ndongolwelu kampàndà wa bulongeshanganyi to. Cìdì cìtùkèngela m'Bukolè bwà Mukalenge Yesù Kìlistò, nè ngàsà udi usùngila, mwalùkile cyàkàbìdì mu èkèleeziyà, pàdì balùme, bakàjì, nsongàalùmè, nè nsongàakàjì, mwà kusùngidiibwa.

⁸⁷ Tudi batàmbe kwindila ntàntà mule bikolè anyi? Kùdikù bààbúngì kuntwaku bìikalà kabàyiku mwà kubwela anyi? Dinà dyà ndekeelu dikaadi dimanè kupikudiibwa anyi? Ke lutàtù lùdiku leelù ewu ndòlù alu anyi? Bìdi mwà kwikala nànkù, nudi bamanyè's. Nudi bamanyè's, bìdi—bìdi mwà kwikala nànkù ànu bipeepèle, nè kabìyiku bìcỳamakana Mifundu to, nànsha kakesè. Bìdi mwà kwikala nànkù. Pa nànkù, katwèna bamanyè mpindyewu to, tùtabalelààyi's.

⁸⁸ Kàdi bàvwa bèèla meeji nè bàvwa basùngìdiibwe, nè—nè, kàdi Nzambì ùvwa mumanyè bìmpè kutàmba mùvwàbo bamanyè. Kàdi's cintu cìmwècìmwè aci cidi cyènzeka leelù ewu.

⁸⁹ Bàvwa bangàte Dìyì òvwà Nzambì mubàpèeshe bwà ditùkù adi adi, bwà nè bìvwa bìkèngela kwikalabo bamanyè ditùkù òvwàYe ùlwa, kàdi benze cilèlè kampàndà ku Dyòdi adi. Yesù wàkamba nè: “Nudi bangàte Dìyì dyà Nzambì nè baDìvwijè kadìyì nè bwenzeji to, ku bilèlè byènù abi.”

⁹⁰ Ncintu cìmwècìmwè aci cidi cyènzèke leelù ewu mu wetù ndongolwelu, ndongolwelu wa butèndeledi wa buloba. Ndongolwelu yà buloba mmyangàte Dìyì dyà Nzambì nè miDìvwijè dyà cilèlè. Nènku's ke bwà cinyi Kadyèna nè bwenzeji mu Dyòdi to. Kakwèna cintu nànsha cìmwè cyàpàtukà mu Dyòdi to, bwalu n'Disopakaja dyònsò.

⁹¹ Kwèna mwà kutèeka ditalà dishùwashùwàle mu cintu kampàndà cidi kaciyi mwà, ànu cyòci ciikàle buloba, cyanààna kadyàkutòloka to. Udi mwà kudyànyika mu muunya nè kudilama nè luuyà, udi mwà kwenza cyùdi muswè kwenza aci, kàdi bìkèngela buloba bwà mùshindù kampàndà. Didi nè cyà kwikala mwómò amu. Didi nè cyà kujiikiibwa. Didi nè cyà kwikala mu cyuyùya cijaalàme, bwà kuditolwèsha.

⁹² Nènku ke mùdi kàbìdi Dìyì dyà Nzambì dyèenza's! Kwèna mwà kwangata èkèleeziyà nè kumufikisha ku mwoyi, ku bilèlè kampàndà to. Udi mufwànyine kutwàla bidimba, mìliyò nè mìliyò, kàdi kwàkutwàlakù Bukolè bwà Nzambì to too nè patwàlukilà cyàkàbìdi ku Dìyì dyà ku cibangidilu, twalukila ku Dìyì dyà cishimikidi, twalukila ku Mashi, twalukila ku—ku Yesù Kilistò, twalukila ku masangisha à mìlòmbò à cyena kale, nè twalukila kùdi Nzambì's! Tudi mwà kwikala bayè kule bikolè, mpindyewu, mu mùshindù wà nè dībà dikaadi diyè. Kàdi, nànsha nànkù, Èvànjeeliyò ùdi nè cyà kuyiishiibwa. Katwèna nè cyà kulumbulwisha aci to.

⁹³ Nzambì ùvwa mumanyè cìvwàbo bàkèngela, ke Yèyè kubàpèesha cìvwà cibàkèngela. Pa nànkù kàbìdi, tudi tusangana, cìvwàbo benzè, tudi benzè cintu cìmwècìmwè aci.

⁹⁴ Russie nè bakwàbò bònsò abu mbaswè wabò. Nè beena maalu à mamanya bashiilèshiiàngàne mbaswè kudyènzela dīnà kampàndà dinène. Ditunga nè ditungà dyònsò didi dijinga

kupeta muntu wadi wa bwongò bwà meeji bu kapyà. Tudi baswè wetù twètù. Tudi baswè ndongolwelu wa bulongeshanganyi mwômò amu. Tudi baswè cyena-màngumba. Ke citùdì bapetè menemene ncyôci aci. Ke cyûdì wêwè mwenzè ncyôci aci. Ke cyûvwà muswè, ke cidi Nzambi mukupèeshe. Mpindyewu newikalè mwà kwenza naaci cinyi paanyimà pàà wêwè mumanè kucipeta?

⁹⁵ Tudi twakula bwà Russie bwà kasunsa kakwàbò. Beena Russie bàdi munkaci mwà kukèba muntu udi mwà kucimuna cibwàshìbwàshì. Bàdi bàbàlongesha nè lùkàsà lwònsò, beena maalu à mamanya bààbò abu. Kàdi bu bôbò mwà kumupeta, ambàâyibì tũng bu bôbò mwà kupeta wabò maasiyà, citwènza ncinyi? Nè luse be bwètù twètù bu bôbò mwà kumupeta's! Vùlukàayi nè, Allemagne mmufùme ku dipeta maasiyà wa mùshindù awu ànu àbìdì àdì panshì aa, Hitler. Kàdi's tudi bamanyè cyàkabènzèlaci.

⁹⁶ Mpindyewu bìshi bwà èkèleeziyà, m'maasiyà wa mùshindù kaayi udi èkèleeziyà mwindile, leelù ewu's? Wêwè, èkèleeziyà, udi mwele lubilà lwà díyì dikolè ditàmbe. Nàнку, citùdì twelela mbilà bwà maasiyà kampàndà, citùdì twelela mbilà ncinyi's? "Ditabuluja mu cikondo cyètù! Alujaayi *cikampàndà*, *cikansanga*, nè *cikankènga*." Cidìbo bindile ncinyi, bwà kucyènza? Ncinyi cìkwàbò cinùdì baswè? Èkèleeziyà ùdi ùkèba cinyi's, twamb'eku twamb'eku?

⁹⁷ Tukàadi bamanè kuMupeta! Nzambi ngudi mutùpèesheYè. Mmulayi Wèndè bwà díbà edi. Tudi tutàngila mu Bible, tudi tucimòna myaba yònsò mu Bible mujimà. Balaaba maanyi kulwabo nè kuvwija Díyì adi nè mwoyi cyàkàbìdì, ànu pa díbà mene bwà díbà adi. Kàdi's tudi nè Maasiyà awu. Ewu's n'Yèyè, Díyì! "Ku cibangidilu kwàkadi Díyì, nè Díyì dyàkadi nè Nzambi, nè Díyì dyàkadi Nzambi." Nè Díyì didi dìshààla ànu Nzambi, Ebèlù 13.8: "Umwèumwè awu makèèlèlè, leelù, too nè kashidi." Tudi bamanyè cidi nè cyà kwenzeka mu ditùkù edi. Twètù tudi tujinga Maasiyà kampàndà. Nè Nzambi kutùpaYè Maasiyà awu, Díyì Dyèndè dilaya bwà ditùkù edi. Ndindile ànu bwà muntu kampàndà udi nè diitabuuja, bwà kuDìlaaba nè kuDìvwija nè mwoyi cyàkàbìdì. Èyowà's, mukalenge. M'Maasiyà mulelèlè, N'Díyì dyà Nzambi. Pààbì, Yesù wàkamba nè: "Maulu nè buloba byònsò bibìdì nebijiminè, kàdi Díyì Dyànyì kadyàkujiminakù to."

⁹⁸ Kàdi èkèleeziyà mmusòmbe mufwè mu nyumà, muyè, díbà ndimanè kubàpita. Mbadyupwile mu tulu tukolè, nè lutàtu lukolè bwà kumanya cyà dyenza, ewu ùnyeemena *elu* luseke nè mukwàbò *lwàlwà* luseke. Kàdi mwab'ewu mulayi wònsò wùdì Nzambi mwenze mu Bible, wònsò wà ku yôyi, wùdì ànu mwaba awu mwímpè menemene ànu mwàkadiyi kacya amu. Díbà ndyòdì edi's! Cidì cìvwija èkèleeziyà mùshindù ewu ncinyi?

Tudi mu cikondo cyà Laòdikiyà, pàdibi bikèngela bwà kulwilabi mùshindù ewu. Dìbà ndyòdi edi bwà cyòci aci.

⁹⁹ Kàdi vùlukaàyi nè, mwómò amu ke dîbà dyàkalwà virgò mukùtākàne awu bwà kusumba Maanyì, nè òwà ndìbà òm̀wè̀m̀wè̀ dyàkalwà Mubàki adi. Tudi tusangana leelù ewu nè, ba-Épiscopaliens, ba-Presbytériens, nè màngumba mashilèshilàngàne, àwà, kùkaadi ndambù wa bidimu, kùvwakù nànsha mwà kubàfuta bwà kuseemenabò pabwipi nè musumbà wà beena kwitabuujà bàà cyena Mpenta to. Nànsha kakesè. Kàdi's ke bóbò abu, leelù ewu, bàbwela. Kanwènaayikù bamanyè cyākambà Yesù anyi? Bàākabwela bwà kusumba Maanyì, nè kwambabò nè: “Tùpèeshaayikù ndambù wa Maanyì ènù awu.” Aba bàvwà nè Maanyì abu, bàākamba nè: “Kabyèna nànkù to. Ndàayi nùkaÀsùmbè, bwà . . . kùdi aba bàdi bàÀsùmbishà.” Nènku pàvwàbò bàteeta bwà kuÀsùmba, pàvwàbò bàteeta bwà kuÀpeta apu! Nudi bamanyè dîbà ditùdi nè mwoyi edi anyi, nwènù beena Mpenta? Pàdibo bàlwa, bàvwà bafwànyine kubwela mu cibwejàkàji, bàvwà bafwànyine kwikala benzè *cikampàndà*, *cikansanga*, anyi *cikankènga*; kàdi, bilondèshile Mifundu, kabàākaÀpeta to. Pàvwàbò bàteeta bwà kucyèenza apu, bàvwà bafwànyine kwikala bapicile mu masaluka ònsò awu, nè pashishe mu tusumbù twònsò nè masaluka, kàdi dyabulù ùdi mwà kutentula bintu byònsò abi. Pàvwàbò bàÀsùmba apu, anyi bàteeta bwà kuÀpeta, Mubàki kulwa, nè aba bàvwà nè Maanyì kubwelabò.

¹⁰⁰ Nènku's ke dîbà ditùdi nè mwoyi ndyòdi adi. Katùtukù banjì kucimòna kwònsò eku to. Yesù wākamba nè bìvwa mwà kwikala nànkù, dîbà adi's ke mùdibi! Citùdi munkaci mwà kumòna ncinyi? Tudi munkaci mwà kumòna Dìyi, dyākamba Nzambi nè nedyènzekè mu ditùkù edi, dyènzeka ànu mwisù mwètù mene. “Kaa, dîbà adi tàbulukaàyi, nwènù bansantu bàà Mukalenge, bwà cinyi kubùnga nè tulù pàdi ndekeelu wènda ùseemena apa; tùdìlongòlòlaayi bwà dibìkila dyà ndekeelu adi,” bwalu katwèna bamanyè dîbà diìkalàdi to. Èyowà.

¹⁰¹ Ndongolwelu wetù wa buloba, ndongolwelu wetù wa èkèleeziyà, ndongolwelu wetù wa cyena-màngumba, ndongolwelu yetù yònsò, mmikooyike nè minyangùke. Citùdi bapangile leelù ewu ke cyàkadibo naaci makèlèlè. Ncyà bushùwà. Bìdi bìmwèka bu dyuminyina, mu maèkèleeziyà, bikolè menemene bwà kupetaku kàbìdì èkèleeziyà udi nè mwoyi nè Dìyi nè mwikàle nè Nyumà wa Nzambi, nè bintu binène munkaci mwà kwenzeka mwàkadibi matùkù mashàāle aa.

¹⁰² Mpindyewu, tudi tusangana nè Nzambi mmumanyè cìvwàbò naaci dijinga, pa nànkù Yèyè—Yèyè ùtu misangu yònsò ànu wàndamuna mulayi. Cìdi ànu Dìyi dinène ditùdi tumòna edi, mulayi, s'òvwa bikèngela kwikalabò bamanyè nè cìvwa menemene ànu cìvwà Nzambi mulayè, ke cìvwa mwà kwenzeka mu ditùkù adi.

Wêwè udi wamba nè: “Mmunyi, ncinyi cìvwà nè cyà kwenzeka?”

¹⁰³ Yeshàayi 9.6, mupròfeta wàkamba nè: “Mbatùlelèlè Mwànà, Mwànà wa balùme, Mwànà; Mwànà wa balùme mmulediibwe, Mwànà mmupèèshìibwe: nè Dìnà Dyèndè nedibìikidiibwè nè ‘Mubedyanganyi, Mfùmù wa Ditalala, Nzambì wa Bukolè, Taatù wa Kashidi’; nè bukalenge nebwikalè pa makaaya Èndè, nè bwà Bukalenge Bwèndè kabwàkwikala nè ndekeelu to.”

¹⁰⁴ Tudi bamanyè nè bìvwà bìkèngela bwà twètù kwikala nè Mwànà mulela mu ditùkù adi, bìvwà bìkèngela bwà virgò kwimitayè difù nè kulela Mwànà. Nè Dyòdi kadivwakù dipicìle mu ndongolwelu yàbò ayi to, ki bwà cinyi kabàakaswà bwà kwikala naaDì bwalu nànsha bùmwe to. BààkaDibènga. Kàdi Dìyi dilaaba, Nzambì (Èmanùwèlè) muvwijìibwe mubidi munkaci mwàbò, mwimàne mwaba awu, Yèyè kwamba nè: “Nganyi wa kunùdi udikù mwà kuMbanda bwà mpèkaatù, bupidyà? Kenkètaayi Mifundu, bwalu mu yòyi amu mmunùdi nwela meeji nè nudi nè Mwoyi wà Cyèndèlèlè, kàdi yòyi ayi’s ke yidi yìMfidila bujaadiki.” Wàkamanyishiibwa ànu menemene nè Yèyè nguvwa Maasiyà awu, Maasiyà uvwa nè cyà kumata mu cyalu mu ditùkù adi. Nè ndongolwelu yìvwa—yìvwa minyangàkàje meeji à bantu, mu tunungu twà ndongolwelu búngitù, nè bikwàbò, mu mùshindù wà nè bàakavwija Dìyi dyà Nzambì kadìyi nè bwenzeji to. Kabàvwa mwà kumòna nè Yèyè nguvwa Maasiyà awu to.

¹⁰⁵ Nènku ànu mwàkacyènzàci musangu awu amu, ke mùdici cicyènze kàbidi. Èyo. Ndongolwelu yà buloba, byamu bilamakaja, bàdi nè pistons mwaba wùvwà—mwaba wùvwà mpompì wa lupeepa nè cyà kwikala, mu byamu byàbò binène bilamakaja abi. Kàdi’s ki bwà cinyi mmunyi mùdici mwà kunyeema lùbilu? Kacyèna mwà kucyènza to. Kacivwa ciibaka mùshindù awu to.

¹⁰⁶ Èkèleeziyà kèna mwà kuya kumpàlà kakùyì Bukolè bwà Nzambì to, ku Dìyi. Nè Nyumà Mwimpè neàshindikè ànu Dìyi dyà Nzambì nkààyaadi, bwalu ke cidiYe nè cyà kwenza ncyôci aci. Dilaabiibwa didi mbwà kushindika Dìyi.

¹⁰⁷ Kàdi’s Yesù nguvwa Mwela maanyi awu, Dìyi divwijìibwe mubidi. Ke bwà cinyi Wàkabwela mu màyi amu, Yèyè uvwa Dìyi dilwa kùdi mupròfeta. Wàkabàtìijiibwa kùdi mupròfeta. Ke mupròfeta awu kujuukayè pashiishe, è kwamba nè: “Ndi nè cyà kupweka; Yèyè neàbandè.” Tudi tusangana nè ke mùshindù wà Nzambì wà dicyènza ngwôwò awu.

¹⁰⁸ Kàdi bààkaDyàkidila anyi? Bìvwà bìkèngela kwikalabò baDìmanyè. Bààkiimana nè kutàngila byenzedi byà Nzambì. Bààkamòna Dìyi dyùle. Bàvwa bamanyè nè Mifundu mmyàmbe cyôci aci, kàdi kabàvwa mwà kwitabuuja nè neDilwe mùshindù awu to. Divwa nè cyà kulwa anyi kùdi Bàfaalèsà peeshi

Bàsadòkà. Bu nè Dìvwa dilwè kùdì Bàfaalèsà, Bàsadòkà kabàvwa bafwànyine kwikala baDyakidile to. Aba anyi aba, Bà—Bàsadòkà kabàvwa mwà kuDyakidila to, bwalu bàvwa bàmba nè Bàfaalèsà bàvwa mwà kwikala naaDì.

¹⁰⁹ Nènkù's mùshindù awu ngùdìbì leelù ewu, ndongolwelu yètù, nè cintu cyònsò mu kaabujimà cikaadi cibolè nè cyonèke. Kaa, ekèlekèlè! Dìbà ditùdì nè mwoyi mpindyewu edi, bàà pa buloba bafofomija, bendela mu mìdimà, bakònamija mu ndongolwelu yà pa buloba ebu, bu mikòòkò kayìyì nè mulami wa mikòòkò to. Pàdìbò nè Dìyì dyà Nzambì udi nè mwoyi dishindika kumpalà kwàbò, kàdì bàkwàta njila bàya mu bufofo, nè kuDishiya, mmunyì mùdiku mwà kutèkemena cingà cintu's? Amen. Ki bwalu mbwòbù abu's.

¹¹⁰ Dìbà adi's, buloba bùdi munkacì mwà kudishinda. Bwà cinyì? Dìyì mene didì dibùswike pàmwè ndibèngiibwe. Tudi tusangana aci mu Ebèlù, nshapità wa 11.

¹¹¹ Einstein kwambayè, mvwa munkacì mwà kutèeleja cisangilu cyèndè mwab'ewu dilòòlò adi, mu New York City, mwàkenzàye cìmwè cyà ku bisangilu byèndè byà ndekeelu, ùvwa wàkula bwà nsangilu wa mìtootò, kasumbù kakesè kàà mabùlùnga lwà mu nsangilu wa mìtootò amu, yèyè nè: "Muntu yèyè ànu mubwele mu cibwàshibwàshì, wènza lwendu mu lubilu lwà bukènkè..." Ncinyì aci, binunu mwandamukùlù...? [Muntu kampàndà ùdì wàmba nè: "Binunu lukàmà nè makùmi mwandamukùlù nè bisambòmbò."—Muf.] Kilòmèetà binunu nkàmà yìbìdì makùmi citèemà nè mwandamutekète nè nkàmà yìsambòmbò ku kasùnsukilà kàà kasunsa. "Mbifwànyine kumwangata lukàmà, kumwangata mìliyò lukàmà nè makùmi àtaanu à bidimu byà bukènkè bwà kufika kuntwaku." Ùvwa mupetè Cyendèlèlèlè. Pashìishe kwamba nè: "Bwà kwalukila, bìvwa mwà kumwangata mikwàbò mìliyò lukàmà nè makùmi àtaanu yà bidimu byà bukènkè, yìvwa mìfwànyine kwikala bidimu mìliyò nkàmà yìsàtù. Nè cipòòlù, cìvwaye muumùke pa buloba aci, cìvwa ànu cìfwànyine kwikala bidimu makùmi àtaanu cyanààna." Ki bwalu mbwòbù abu's, mubwayike mu Cyendèlèlèlè! Kaa, ekèlekèlè! Bunène bwà Nzambì, pààkenzàYe ndongolwelu mujimà wa mabùlùnga apu's wè!

¹¹² Nènkù mubàndi wa mu mabùlùnga ewu, ditùkù adi, ùbùùka eku nè eku kwà Russiè, nè kwambayè nè yèyè "kàvwa mumòne Nzambì nànsha, Banjèlò to." Mùshindù mwinè wùdì bantu mwà kwikala bapangi's wè! Pàdìbì nè...

¹¹³ Nzambì's! Nè ndongolwelu mujimà wa mabùlùnga, Yèyè wàkamwelela mupùùya mu byanza Byèndè; nè Yèyè mmusòmbe mìliyò bùngiyì yà bidimu, bidimu byà bukènkè, bipìte apu. Nè cintu cyònsò mu kaabujimà ncikwata kùdì Bukolè Bwèndè nè Dìyì Dyèndè. Àlèluuyàh! Mùtootò wònsò wùdì nè cyà kulembelela pa kaaba kààwù. Èyowà's, mukalenge! Dìbà adi,

ùvwa mupwekelè bikolè bwà kupwekelela nè kuvwijiibwa umwe wa ku twètù, bwà kutùfwila; katwèna nè pàà kumbingila to. Bu byòbì mwà kwenzeka nè wùmwe wà ku mitootò ayi wùumukè mu bimpòkòmpòkò byàwù, wùmukila mu cijèngù cyàwù mùdiwu amu, bu cyòci mwà kunyunga, ncifwànyine kwikala nè bwenzeji pa ndongolwelu yònsò mu kaabujimà. Ndongolwelu mujimà udi nè cyà kunyùnguluka ànu mùshindù wùmwe wùmwe menemene, bwalu ewu mmweyèmèna mukwàbò.

¹¹⁴ Nènku ndongolwelu wa Nzambi, pàdiyi mu dipetangana Nendè mu mùshindù mupwàngàne, cintu cyònsò mu kaabujimà cidi cikwàta mudimu bipwàngàne. Ncyà bushùwà, bwalu cidi nè cyà kwenza nànkù.

¹¹⁵ Kàdi èkèleeziyà kààkangatakù ndongolwelu wa Nzambi to, wàkadyènzela ndongolwelu wèndè nkàayèndè. Ke bwà cinyi katwèna bònsò mu dipetangana to. Ke bwà cinyi èkèleeziyà ùdi mu cimvundù cyà dikemà. Ke bwà cinyi buloba bùdi munkaci mwà kudishinda leelù ewu, bwalu tudi basungùle ndongolwelu yètù sungasunga. Ki bwà cinyi maalù à cidiidi mmadishinde. Ke bwà cinyi bukwàntèndeleele mbudishinde, mbwalu tudi bangàte ndongolwelu kampànda pamutù pàà kwangata ndongamu wa Cyendèlèlè wa Nzambi bwà bikondo. Amen. Ke lutàtù lùdiku nè bàà pa buloba ndwòlò alu. Ke cyòci aci menemene cidi cibi, mbwalu mbangàte cintu kampànda cikwàbò. Mbifikishe bantu ku ditàma kwikala nè: “Mémè ndi Presbytérien. Ndi Méthodiste. Ndi Unitaire. Ndi Trinitaire. Ndi. . .” Kaa, luse’s wè! Kabyèna bikèmesha to mutùdi katùyi mwà kushààla bakwàtàngàne, kakwèna cintu nànsha cimwè bwà kutùlama bakwàtàngàne pàmwè to.

¹¹⁶ Mukalenge Nixon wàkamba bwalu bwà lungènyi lutwè bũnkadiku mùmve mfùmù wa ditunga anyi cindondà mwakùle mu bidimu bikesè bishààle ebi, pààkambàye ditùkù adi nè: “Mbwalu kaayi ebu nè beena Àmèrikè’s, mbajimije dinanga nè kaneemu bwà muntu nè mukwèndè.” Pàdi beena ntanda bàà beena Àmèrikè munkaci mwà kushebeyangana ku cingoma muntu nè mukwèndè, mu mùsèèsù, tudi mwà kucyènza munyi? Ekèlekèlè!

¹¹⁷ Wèwè kùyi mwà kupangakana nè muntu, kàdi kumunanga musangu wùmwe wùmwe awu to, nènku ùkangà mukana. Wèwè kùyi mwà kumwambila, mùdi papa ùlongolola mwanèndè mulèla, nè dibòkò dijinga bwà kumujiingila ku nshingù nè kumwela mu citupà pashìishe, uvwa kwenza bimpè bwà kumulekela kwà tàlâlà. Kwèna mwanji kuya ntàntà mukùmbàne to, wèwè mwinè, bwà kumanya cyùdi wamba aci. Cyà bushùwà. Ndi mwà kupangakana nè muntu kampànda, cyà bushùwà; ùcidi ànu mwanèètù, nèmukwàte ku cyanza. Ncyèna mwà kumulekela mu cintu aci to; mémè mwenze nànkù, mémè nciyi mumwambile, ncyèna mwà kwikala mwanààbò mujaalàme kùdiye to. Aci mmwòmò. Kàdi ndi mwà kumwambila, nè

kumwambila nè ndi mumunangè, nè kumujaadikilaci nè, ndi mumunangè.

¹¹⁸ Kabyèna bikèngela bwà wèwè kumwasa cingoma, mu mùsèèsù to. Ntu mpangakana nè Mukalenge Kennedy nè—nè cidiidi cyèndè, nè ntèndeleeu wendè, nè bikwàbò, kàdi kàvwa mukùmbànyine aci to. To, mukalenge. To, nànsha kakesè. Muntu nànsha umwe kèna ùkùmbanyina aci to.

¹¹⁹ Pa nànkù, tudi tusangana nè buloba bujimà mbunyangùke. Ditùngà dyètù, cidiidi, ndongolwelu yà ntèndeleeu, nè bikwàbò byònsò, mbinyangùke.

¹²⁰ Bidi ànu munkaci mwà kwindila cyanààna. Dìyì dyà Nzambi, òwà dyambiibwe mu cipròfeta bwà ditùkù edi adi, ndindila bwà muntu kampàndà kulwayè kuDishindika. Ndi ndikonka Yèyè ní ùkaadi mumanè kucyènza? Nànkù tudi penyi dībà adi pùkalàbi nè Yèyè ùkaadi mucyènze? PùkalàYe mucyènze, dībà adi tudi penyi? Batàmbe kukwàta ne byà luse's!

¹²¹ Mwà mwambè cintu kampàndà cicolè bwà Màndàmù Kennedy, misangu bu yibidi, pa bidì bitàngilà mùdiye ùleeja bàà pa buloba myòdelè, nè cisuba cyà nsukì mikòsa eyi, nè “Mùshindù mwinè wùdi bàna bèètù bàà bakàji nè bakwàbò bàkosa nsukì yàbò, nè balwàta bu Màndàmù Kennedy,” Mémè nè: “bu Izàbèlè wa kale awu.” Aci's ncilelèlè. Ndi ngùtabuuja nànkù. Ndi—ndi—ndi ngùumvwila maamù mukesè awu luse dilòòlò edi, nè bàna bèndè abu, ànu menemene.

¹²² Kàdi lekèlaayi nnùkonkèku cintu kampàndà. Bu Jacqueline Kennedy mwà kwikala muumvwè Mayiisha àdi bàmwè bàà kunùdi nwènù beena Mpenta bùumvwè, pa bidì bitàngilà dibebula dyà nsukì yènù nè bikwàbò, yèyè kàvwa mene mufwànyine kwikala mubèbùle nsukì to. Nwènù's nudi bamanya nè nudi beena mpenta, kàdi's nucidi ànu nucyènza's! Uh-huh. Uh-huh. Yèyè mmufwànyine kubenga kucyènza bu yèyè mwà kwikala mupetè mpùngà nè muumvwè Mukenji, nwamònu's, nwènù nukàadi bumvwè's. Ki bwalu mbwòbù abu's. Tudi mu mwaba mubi, balumyàna wà yààya. Aci's ncyà bushùwà menemene. Èyowà's, mmwòmò. Èyi Nzambi, mùshindù mwinè wùdi maalù à nsòmbelu mulenga, cintu aci. . .

¹²³ Bukàji ncimwè cyà ku bintu bidì bilama ditùngà dyètù kaaba kàmwè. Ke mufùba wà mwongo. Nènku bukàji, bukolè bwimpè bùdì Nzambi mupèeshe mukàji bwà kwikalayè maamù abu, mòna's, bùdi—bùdi—mbuyè. Kùkaadi ntàntà mule bàkaadi—bàkaadi—ba—bakàji bàà pa buloba ebu, ngikàdilù wabò wa bukezùke, ùkaadi mwinàmìne nzambi mukàji wa cyena Hollywood; bàtentula, nè bàvwàla, nè bènza maalù bu mùdi bàmwè bàà ku bakàjààna bende lumù bàà mu Hollywood aba benza amu. Nè kùdi misangu yàbùngì yidi mene mvwàdilù udi kàyì ùneemeka Nzambi, wà ùsalula masandi awu, mwàngaciibwe bu myòdelè mu màkèleeziyà. Nè bampaasàta

paanyimà pàà cyambilu, kabàyi nè—kabàyi nè dikàmakàmà, kabàyi nè—nè dikàndà dyà Nyumà Mwimpè to; bu Lotà kampànda musòmbe mwaba awu, ùtácisha musùukà wèndè, nè mutámbe kwangaciibwa kùdi ticket wa byákudya byà kàyi mwà kwambila bantu nè mbibì to. Eyowà.

¹²⁴ Cidi citùkèngela leelù ewu ndijoomona. Tudi mwà kujoomona kakùciyi dībā to mpindyewu. Dībā ndifwànyine kwikala dimane kupita. Katwènakù nànsha nè ditàbuluja dikwàbò to. Ndi mumanyè nè nudi munkaci mwà kudindila, kàdi ncyèna ncimòna mu Mifundu to.

¹²⁵ Ndi mwindila Dyambwibwa, ànu bwà dyanza dyà bantu cyanààna. Ncyà bushùwà, ànu dyanza dimwè dyà bantu cyanààna. Kabààdyakupangika kùdi bàà pa buloba nànsha. Pàdibo bàya, kwàkumanyakù nè mbayè to. Ncyà bushùwà. Necilwe bu mwívi bufùkù.

¹²⁶ Nè Yèyè kàyi mwipidije mudimu awu to, bwà bwalu bwà Basungula! Kùdi bàmwè basungula bwà Mwoyi wà Cyendèlèlè, tudi bamanyè aci; ki mùdibi bwà bònsò, bàdi nè Mwoyi wà Cyendèlèlè. Nènku bóbò—nènku bóbò...anyì dībā adi Yèyè kàyi mucikòsoloje, bwà bwalu bwàbò to, mubidi nànsha wùmwe kawàkusùngidiibwakù to. Buloba mbutwilàngàne nè kabùtù kààbù, bidimu binunu bibidi byònsò. Tudi bamanyè nè ndongolwelu mmudishinde. Wàkadishinda mu matùkù à Noà. Mu matùkù à Kìlistò, wàkadishinda. Nènku ke cidimu cyà 1964 cilwalwà eci, cìdici cìshiya ncinyi? Bidimu makùmi àsàtù nè bisambòmbò kumpàla kwà bikwàbò binunu bibidi; cicyà cyà makùmi àbìdì nè cìmwe, cyà makùmi àbìdì nè cìmwe cilwalwà eci. Cìdì cyènzekà ncinyi? Mudimu wùcidi ànu nè cyà kwipidijibwa. Yesù wàkamba, di—dinyanguka dyà ditùkù edi nè: “Basungula bàvwa mwà kuseeswishibwa nè kabàvwa mwà kusùngidiibwa to, bu byòbì mwà kwenzeka.” Ki bwalu mbwòbù abu’s. Nè kabala-matùkù kàdi kàtwàmbila, bilondèshile maalù à mamanya nè, tudi kule naaci mu bidimu bitwe ku dikùmi nè bitaanu. Tudi paanyimà nè kabala-matùkù kàà cyena Loomò, bilondèshile kabala-matùkù kàà beena Yudà, nè tudi mu bidimu dikùmi nè bitaanu, makùmi àbìdì paanyimà pàà cyòci aci.

¹²⁷ Pa nàнку tudi penyì? Tudi tumòna matùnga àpanduluka, nè Izàlèlèlè ùtàbuluka, bimanyinu byàkadyànjilà Bible ewu kwamba bwà ditùkù edi abi. Tudi tumòna bintu bikwàtakaja munkaci mwà kwenzeka. Mpindyewu Nyumà, bukolè bwendeshi bwà Dîyi dilaya adi, bwà kubwelabù mu Èkèleeziyà Wèndè nè kubàbweja mu Kàlvariyo mwàmwa, nè mu Dyambwibwa! Nènku’s ki bwalu mbwòbù abu.

¹²⁸ Kabyèna bikèmesha to patùdì tudishinda, kakwèna cintu nànsha cìmwe...Cintu mene cyàkafùka buloba aci, Cintu mene cyàkatèèkiibwa mwaba ewu bwà buloba kunyùngulukilapù aci, Cintu mene ciwà ndongolwelu nè bikwàbò byònsò nè

cyà kunyùngululukilakù aci, Dìyì edi, kwàkafwìmbilà Nzambì, buloba. Einstein wàkamba mu wendè, wàmba nè: “Kùdi dyumvwija ànu dìmwpèlè dyà Mifùndu... Dyumvwija ànu dìmwpèlè bwà buloba ebu kwikalabùku,” mwàkambàye, “ng’Ebèlù 11: ‘Ku diitabuuja tudi tuumvwa Dìyì dyà... ku Dìyì dyà Nzambì nè, maloba àkafwìmbiibwa pàmwè kùdi Dìyì dyà Nzambì.’” Kwàjiki. Kakwèna muntu nànsha umwe udi mwà kwamba mùdibu bulembelèle kwàka mu lupeepèlè to, nè mùshindù wùdibu mwà kunyùnguluka nè kwenza mèbà àbù makùmi àbìdì nè ànaayi bùyùngulukila mushoonyi wà équateur awu, nè bikwàbò mùshindù awu, nè mu nyungulukilu wa cijèngù cyàbù, myaba yònsò, nè kwalukila pa kaaba kàmwekàmwe nè kabùyiku mwà kupangila kasunsa kàmwe to. Nè dìnà mùtootò wònsò wùyùngulukila mu wawù njila mùshindù awu, nè yènda yìkwàcishangana pàdìyì munkaci mwà kunyùnguluka apu.

¹²⁹ Mùshindù mene wùdi ngondo awu ùkòntonona mbù kuntwaku’s! Ngondo awu yèyè ànu mudìdinge mupàtùke mu mwaba wèndè, tudi bafwànyine kwikala babwikidija kùdi màyi mu bule bwà metèlè makùmi àsàtù majimà, ànu mu kasùnsukilà kàà kasunsa, anyi túbìdì cyanààna. Ngondo awu’s! Tàngilàayi, nudi mene mwà kumbula ciina mwab’ewu, nwènù bàtù bumbula kàsòloonyi abu, kumbula mwab’ewu. Nudi numòna mùshindù wùdi mwelelu wà mbù kule neenù anyi? Nudi numbula ciinà mu buloba emu mwab’ewu, kàdi nutàngila mu díbà dyà dilòlò, mùdi divwala dyà màyi à mbù dibwelamù, necipàtule màyi mu lubungu lwènù amu, màyi ènù à mukèlè awu. Cyà bushuwà’s. Ncinyi aci? Ngondo awu ùdi ùkòntonona, kwàka nàka.

¹³⁰ Nndongolwelu wa Nzambì. Nndongamu wa Nzambì. Ndìyì ditùma dyà Nzambì. Kàdi, tudi tudyènzela dyètù twètù nkààyeetù, katwèna twangata Dyèndè Yèyè to. Tùlwijakajàayi mpindyewu, bwà kujikija. Ànu mùvwàbi cikondo aci, mbyà mwomùmwe nè mu Noël ewu, tudi tusangana nè buloba bwètù bùdi munkaci mwà kudìshinda. Kaa!

¹³¹ Nzambì wàkeediibwa maanyì, nè Wàkalaya Dìyì Dyèndè. Yèyè wàkatùlaaba maanyì kwàwa, nè kutwàmbila Yè, kubàmbila nè: “Pààkeelàye Yesù Kilistò maanyì apu...” Peetèlò wàkamba mu Ditùkù dyà Mpenta, wàkamba nè: “Yesù Kilistò, Muntu mwanyishìibwe kùdi Nzambì munkaci mwènù ku bimanyinu nè maalù à kukèma, cyàkenzàYe munkaci mwènù aci; nwènù biinè nudi bamanyè’s.” Bòbò’s mbantèmù. Kàbìdì mmwambè nè: “Paanyimà pàà dibìikà dyà ku lufù, nè bikwàbò, mwàkenzàYe amu’s! Mùshindù mwinè wunùdi nè byanza byà cikisu bakwàte Mfùmù wa Mwoyi nè bapoopèle pa nkùrusè, Yèyè udi Nzambì mubiishe ku lufù awu; nè twètù tudi bantèmù.” Mùshindù wàkalwà Nìkòdemè kwamba nè: “Laabi, tudi bamanyè. Twètù Bàfaalèsà, Tubàdi tukùlù twà beena Yudà kuntu kwàka, tudi bamanyè nè Wèwè udi Mulongeshi mutùma kùdi Nzambì. Muntu nànsha umwe kèna mwà kwenza bintu byùdi Wèwè wenza ebi to

ànu byôbi biikàle byà kùdi Nzambi.” Bàvwa bamanyè nè mulayi awu wùvwa bwà kuntwaku, nè bàvwa bamanyè nè wùvwakù, kàdi ndongolwelu yàbò yìvwa mibàswike bikolè mu mùshindù wà kabàyìku mwà kwenza kantu nànsha kàmwè pa bwalu abu to.

¹³² Ke mùdibi kàbìdì leelù ewu, cintu ànu cyôci cìmwècìmwè aci. Kwéna mwà kucyèenza to, neùlekelè kartà kèèbè kàà buumambàlà aku ànu musangu wà kumpàlà wùdi ucyèenza awu’s. Fùnda wèwè ànu mwaba awu pa Dìyì dyà Nzambi adi musangu kampàndà, kàdi ùmòne cìdi cyènzeka; kwèbè nkujike. Kwàkwikala munangìibwe to. Newìpaciibwè munkaci mwàbò, nè bikwàbò byònsò.

¹³³ Kaa, wèwè nè mudimu mukesè wà bwambi, nebàkulamè bwà mfranga yidìbo mwà kupeta ayi, kubàkungwijila musumbà wà bantu ku mudimu wèbè wà bwambi awu, kubàkokela mfrangà nè bikwàbò. Kàdi tàngilàayi ànu nùmonè pàkaadìbi bikafika ku Dìyì, bàtàngilaaayi nùmonè mùdibo bààluka paanyimà bàcìina Cyôci aci. Nudi nwela meeji nè musadidi wa Nzambi kì mmumanyè aci anyi? Èè, Yesù’s ùvwa mene mumanyè nè Yudaàsà ùvwa munkaci Mwèndè. Yesù kààkambilakù Yudaàsà cintu kampàndà bwà cinyi? Kabingilà kàmwèkàmwè aku kàdiku leelù ewu, bikèngela windilè too nè pààlwà dìbà adi bwà diseeswishangana adi. Ncyà bushùwà. Bàdi naaci. Nebàcipetè.

¹³⁴ Mònaayi’s, kàdi kabàvwa baswè mùshindù wàkalwàYe awu nànsha, ke mùdibi kàbìdì leelù ewu. Maèkèleeziyà dìbà adi àvwa àjinga bwà ndongolwelu yàbò kulaabiibwayi maanyi. Bàfaalèsà bàvwa bàjinga bwà ndongolwelu wa Cifaalèsà kulaabiibwaye maanyi, Basadòkà bàvwa bàjinga ndongolwelu wa Bàsadòkà awu, beena Helòòdè pààbò, nè bikwàbò. Ke mùshindù wùdibi leelù ewu. Bu bôbò mwà. . . Bu Nzambi mwà kutùma dilaabiibwa, nè kulaaba ba-Unitaires maanyi, kaa, ekèlekèlè, kì mbafwànyìnekù kwambila ba-Binitaires bwalu abu, anyi ba-Trinitaires, anyi cyònsò cìdici aci anyi? Beena Assemblées kabàvwakù bafwànyìne kwambila ba-Unitaires cyôci aci anyi? “Mémè’s mvwa munwàmbilè nè tuvwa mu bulelèlè!” Ba-Méthodistes’s bàvwa bafwànyìne kwambila ba-Baptistes nè: “Éyi balùmyàna wa yààya, nwamònu’s, twètù’s kì bàdi nè cintu!” Nudi nujinga bwà ndongolwelu wenù àlaabiibwa maanyi.

¹³⁵ Kàdi Nzambi mmulayè ànu bwà kulaaba Dìyì Dyèndè maanyi. Amen! Ndi mumanyè nè aci cìdi cyôsha, kàdi’s ke cìdi Bulelèlè ncyôci aci. Nzambi kàtu ùshintulukakù to. Ùtu ùlaaba Dìyì Dyèndè maanyi. Èyowà’s, mukalenge. Dìyì dilaaba, dilaya bwà cikondo aci ke didì Nzambi ùlaaba. Dìyì dilaya bwà cikondo aci’s!

¹³⁶ Leelù ewu mbaswè ndongolwelu wa dilonga dyà tulaasà, (bwà cinyi?) bwà bààmòna mwà kwenza cintu kanà cyònsò cìdibo

baswè kwenza aci, kàdi kutùngunuka ànu nè kulama ditonda dyàbò dyà bwena Kilistò adi. Kaa, bôbò nè cintu kampànda cinène cyà menemene, mùdì mwà kubwela, kupweka nè mìlongo, nè bikwàbò, nè kucyànkunya bàzòkà, nè—nè kwafunyangana; nè kupàtuka nè kwikala nè bibambalu byà diikisha nè bikwàbò, kunùdì bônso nuya bwà kunaya ndundu wa dyela mu tubòndo nè bikwàbò byà mùshindù awu's. Ncyèna nè bwalu nànsha bùmwe nè ndundu yà kwela mu tubòndo, ndundu yà tubwengà, ndundu yà makàsà, anyi ní ncinyi cyònsò cidici aci to, cyà cinène... pìikalàci ke webè nzambi yònsò, cidi ànu ncifukufuku cinène cyà lupeepèlè. Kàdi lekèlaayi nñwàmbilèku, cidi citùkèngelà leelù ewu n'Dìyì dyà Nzambi, dilaaba bwà cikondo eci, diikalà mwà kupàtula cyàkàbìdì Bukolè bwà Nyumà Mwimpè. Eyo, bikwàbò abi mbimpè, kàdi abi kí mbyà mu èkèleeziyà to. To, mukalenge. Bikèngela wibakè cintu kampànda cyà mùshindù awu, bwà kulama èkèleeziyà pàmwe, bivwa bitàmbe bwimpè wèwè kumwosha anyi kumwela pambèlu, anyi kubwejamù cintu kampànda ciikala mwà kwaluja Dìyì adi cyàkàbìdì. Nènku ke bintu byà pa buloba mbyòbì abi, kaa, kubisambakaja nè Dìyì dyà Nzambi, kwèna mwà kucyenzaku to. To, mukalenge.

137 Èyowà's, mukalenge, mpindyewu bôbò mbaswè ndongolwelu kampànda. Bàà pa buloba nebàngatè ndongolwelu kampànda. Mpindyewu tudi tusangana nè, ndongolwelu mukesè yònsò mu wèndè mùshindù, yònsò wa kùdiyi ùdi wàmba nè: "Ndi muswè bwà Àlwe kùndì mèmè. Ndi muswè bwà Àlwe ku wanyì mèmè." Kaa, bàdi munkaci mwà kupeta màshinyi manène, nè bàlongesha bayiishi, nè bintu byà mùshindù awu, nè kubàpàtula, kubàtooyisha, balùmyànà wa yààyà, nè byà meeji à mu mitù; mu mùshindù wa nè, èkèlèkèlè, mukwàcikwètù ùmwà nè myàkù yèndè, mwakulu wèndè, mbibì bikolè, kàyì nànsha wítàba bwà kupita mu cyambilu paanyimà pàà umwe to. Kàdi citùdì tukèngela leelù ewu kí ndongolwelu wa dilonga dyà tùlaasà to, kí mmalongesha mabala to.

138 Cidi citùkèngelà leelù ewu ng'Èvànjeeliyò mwambula kùdi Bukolè bwà Nzambi, bwà kushindikà Dìyì dyà díbà edi, mwaba wàlwà muntu kampànda wíkala mwà kujuuka kàdi kubìikila cifiike nè "ncifiike," nè citòòke nè "ncitòòke," muntu kampànda wàjuuka kàdi kwamba Bulelèlè, nànsha dikooshè anyi dikupòòpòle masàlà, anyi cyònsò cyènzàDi aci. Ke cyòci aci menemene cidi—cidi díbà edi dílòmba, leelù ewu.

139 Kàdi bantu mbaswè cintu kampànda. Bantu leelù ewu, bakàji, cidìbò bàjinga ncinyi? Mbaswè bwà ba—ba—cisàmbà, mpaasàtà, wíkala mwà kujuuka kwamba nè: "Mbimpè. Udi mwà kwenza *cikampànda*, anyi kwenza *cikansanga*. Anyi, abi's mbimpè, kakwèna bwalu bubì mu biinè *abi* to, munanga wanyì." Muiyiishi awu ùdi ùkèngela mfimbù wa Èvànjeeliyò; ùlekela nsukì mibebula ayi, dilaaba dyà bilaabu byà kwìsù.

To, wêwè udi wamba nè: “Aci cidi nè bwalu kaayi bwà dyenza naaCi?”

140 Kwèna mumanyè nè mmwènekèlu webè wa pambèlu wùdi wùleeja cidi munda anyi? Bible kèna wàmbakù nè kabivwa bikèngela bwà wêwè kwenza nànkù anyi? “Kí mbîmpè mene bwà muntu mukàjì kusambilayè mùshindù awu to.”

141 Nè wêwè mulùme udi muswè cintu bu nànkù anyi? Nwènu bayiishi, kanwèna mwà kucyàmba to, bwalu nenùlekelè kartà kèènu kàà buumambàlà aku, nsangilu munène awu neàkwipàte wêwè mwàmbè cintu kampàndà pa bwalu abu. Nzambi àkwacishèku muntu udi mufwànyine kutàmba kwelangana meeji pa kartà kàà nsangilu anyi kartà kàà buumambàlà kutàmba mùvwàye mufwànyine kwela meeji bwà dibàtiiza dyà Nyumà Mwîmpè, nè Dìyi! Mmunyi mùdiku Nyumà Mwîmpè, udi mufunde Bible awu, mwà kuvila cidiYe mufunde’s?

142 “Èè, matùkù à bishimà, kaa, kabyèna bitùkèngela aci leelù ewu to. Dyondopa dyà kùdi Nzambi, bintu bikwàbò ebi, byà nè, cintu bu nànkù kacitùkù to. Aci’s ndubùku, mbwena kwamba nè, kaa, lubùku.” Wêwè, mupèlè, mupwekèshìibwe milongo, mbwalu kaayi ebu neebè’s? Bidi bitùkèngela—bitùkèngela Èvànjeeliyò, piikalàbi nè Nyumà Mwîmpè ùdi munda mwèbè!

143 Bu mèmè mwà kukwambila nè: “Mwoyi wà Beethoven wùvwa munda mwànyì,” mvwa mwà kufùnda misambu. Piikala Beethoven musòmbèle munda mwànyì, s’mvwa kwikala nè mwoyi wà Beethoven. Bu nè Shakespeare ùvwa munda mwànyì, mvwa mwà kufùnda tusàlà. Ndi mufwànyine kufùnda manàyi, bu Shakespeare musòmbèle munda mwànyì.

144 Nènkù piikalabi nè Yesù Kilstò ùdi nè mwoyi munda mwèbè, byenzedi byàkenzaYe abi, nè Dìyi Dyèndè, Yèyè ùdi Dìyi, nèDishindikè mu ditùkù edi, ku mulayi mene wàkafilàye. Amen. Ke cidi Nzambi mwindile ncyòci aci. Ke cidi cilamè buloba, bwabùlùka, cidi cilamè buloba pàmwè, cilamè bukwàntèndeleelelu pàmwè, n’Dìyi Dyèndè, dilamè kantu nè kantu kàà ku Dìyi adi pàmwè. Èyowà’s.

145 Bantu mbaswè ndongolwelu wa mùshindù awu, nànsha nànkù. Nebàmupetè. Bàkaadimù, ànu patùdi twakulangana apa. Nsangilu wa Maèkèleeziyà wa Buloba bujimà neàbàpèeshe ànu cidìbo baswè aci, yònsò wa kùdìbo pàmwè. Mmunyi mùdi beena Mpenta aba mwà kusòmba mu mpungilu eyi, nè kubwela mu Cimenga cyà Vatican nè kufùnda mukàndà wa dyendesha, nè kwamba nè: “Cintu cyà citàmbe kwikala cyà mu nyumà cínkaadiku mwambè, pàndi musòmbè ku luseke lwà Taatù wa Bunsantu Paapà *Kampàndà*,” nè kwikala mwena Mpenta nè kumanya mùshindù. . . Nkwaka mufwè wa cyena Mpenta. Cintu cyònsò mu kaabujimà ncifwè. Ncinyangùke. Bwàci mbujikè’s! Ncyalukile buludì mu Nsangilu wa Maèkèleeziyà mùtùci cyà mwòmò. Bushùwà menemene.

¹⁴⁶ Kàdi Èkèleeziyà wa Nzambì udi nè mwoyi, Mukàji-musèla awu, ùdi ànu ùtùngunuka ànu bu nè kakwèna bwalu to. Nè Yèyè neàye mu Dyambwibwa, ku Dìyì, ncyà bushùwà, Dìyì nè Dìyì nebitwilanganè. Twètù biikàle citùpà cyà Kilistò, citùpà cyàDì, bikèngela twikalè Dìyì Dyèndè, bwalu Yèyè ùdi Dìyì. Cyà bushùwà. Èyowà's, mukalenge.

¹⁴⁷ Mbabènge Dìyì dilaaba dyà mulayì, dyà cikondo eci, nè Yèyè ùdi misangu yònsò ànu Dìyì. Pùkalàbi nè Nzambì mmutùtùmine kàbìdì Dìyì dilaaba, dilaya, bwà cikondo eci, mu cidimu cyà 1946, Yèyè ùvwa mwà kwikala umwèumwè awu mùvwàYe pàakalwàYe ku cibangidilu apu, Dìyì dilaaba bwà cikondo. Ebèlù 13.8 ùdi ùkwalujilacì buludì pambidi, wàmba nè: “Yèyè ùdi umwèumwè awu makèèlèlè, leelù, too nè kashidi.” Ncyà bushùwà menemene. Nènkù twètù. . . Nè Yèyè ùvwa mwà kushààla nè Dìyì dilaya dyà Taatù bwà cikondo eci. Bu Yesù mwà kulwa, Yèyè ùvwa mwà kwikala menemene ànu cìvwà Dìyì dyambè nè ke Cìvwà mwà kwikalakù mu eci cikondo.

¹⁴⁸ Ke cìvwà Eliyà mu cikondo cyèndè. Ke cìvwà Mòsà mu cikondo cyèndè. Ke cìvwà Noà mu cikondo cyèndè ncyòci. Aci's ke cìvwàku, myaba yònsò, cyàkalwà mupròfetà yònsò ùkàadikù mulwè ewu. Nènkù Dìyì adi—adi, pàakalwàDi mu kaabujimà, Dìyì dyònsò mu kaabujimà divwijìibwe mubidi munkaci mwètù, Dyàkenza ànu menemene cyàkambaDi nè Dìvwà mwà kwenza mu cikondo aci.

¹⁴⁹ Bu Dyòdi mwà kulwa leelù ewu, Yèyè's mmufwànyine kwikala ànu menemene Yesù Kilistò mwikàle nè mwoyi ku mulayì Wèndè wà cyàkalayàYe bwà kwenza aci, ànu mùdì Dìyì amu.

¹⁵⁰ Yèyè ùvwa Dìyì. Yeshààyi 9.6 n'Yesù Kilistò. Kàdi pàakavwijìibwàDi mubidi nè kusòmba munkaci mwètù, Dyàkenza ànu menemene cyàkenzàDi aci. Mòsà wàkamba mwaba awu, mu Mukàndà wà Ekèsòòdè nè: “Mukalenge Nzambì webè,” anyi mu Dutèlòndòmà nè: “Mukalenge Nzambì webè neàjuulè mupròfetà, mufwànàngàne naanyi; nènkù nebyènzekè nè, ewu yònsò wabènga kuMutèèleja awu, neùmushiibwè munkaci mwà—mwà cisàmbà.” Nènkù pàakalwàYe, Wàkenza ànu menemene cìvwà Dìyì dyambè nè Neènzè aci. Kàdi kusanganabò cilèma kùdiYe, bwalu ndongolwelu yàbò yìvwà miDìkòsòlòlè nè mivwijè Dìyì dyà Nzambì kadiyì nè bwenzeji kùdìbo nànsha. Nwamònu anyi? Kabàvwa mwà kwitabuuja bintu bu Nànkù to. Kabàvwa mwà kwitabuuja bintu byà mùshindù awu to, bwalu dībà dīkaavwa dipite, mwàkadyàmbidilàbo. Kaa!

¹⁵¹ Bwalu, Yèyè mmujaadike nè Dìyì Dyèndè dīdi cintu cīmwcīmwe. Yèyè's mmufwànyine kushindika Dìyì leelù ewu, mùvwàYe muDìshìndike musangu awu amu. Yèyè's mmufwànyine kupiisha, bikolè menemene, ndongolwelu yònsò

wa cyena-màngumba wa pa buloba, bu Yèyè mwà kulwa pa buloba leelù ewu. Ke cyàkenzàYe ncyôci aci, dyàmbedi. Ke cintu cìvwàYe mwà kutuuta ncyôci aci. Ke aci menemene cyàkatuutàYe pàakalwàYe dyàmbedi. Ànu mwàkenzàYe musangu awu, ke mwikalàbo mwà kwenza bwà cikondo eci, kàbìdì. Nè Yèyè wàkacyenza musangu awu, bwalu Yèyè kàtu ùshintululakù Dìyì Dyèndè to. Yèyè kàtu ùshintululakù ndongolwelu Wendè to. Cìdì misangu yònsò ànu cimwècimwè aci, Cìdì n'Dìyì dilaaba musangu wònsò, bwà cikondo. Ncyà bushùwà.

¹⁵² Pa nàнку kàbìdì, patùdì tucìsangana leelù ewu apa, bu Yèyè mwà kulwa, ndongamu Yèndè bwà kulama buloba pàmwè mmifwànyìne kubèngiibwa ànu mwàkadìbì musangu awu.

¹⁵³ Kàdì tèelejàayi, bwà kujikija, ndi muswè kwamba nùнку. Kì mbatùlayè ndongolwelu kampàndà, kì mbatùlayè dīgumba kampàndà, dīgumba kampàndà dyà ditàmbidile, ndongamu kampàndà wa mutàmbidile wa mùshindù kampàndà to. Kàdì mbatùlayè Bukalenge, Bukalenge bwà Cyendèlèlè. Amen. Ke cìdì citùlaya ncyôci aci, biikàle nè Mwoyi wà Cyendèlèlè mu Bukalenge bwà Cyendèlèlè ebu. Nè Bukalenge mbukòntonona kùdì Mfùmù wa Cyendèlèlè, Dìyì Dyèndè dyà Cyendèlèlè difidiibwe kùdì cisàmbà Cyèndè cìdì nè Mwoyi wà Cyendèlèlè adi. Nè bantu bàà Mwoyi wà Cyendèlèlè kabèèna bàcyònkòmokela pa bintu byà pa buloba to, kàdì bààkafùnda, nè: “Muntu neikalè nè mwoyi ku Dìyì dyònsò didì dipàtukà mukana mwà Nzambi.” Pa nàнку patùdì twètù bònsò mpindyewu. . . Tudi tupeta Bukalenge ebu, nè tujandula nè: “Dyulu nè buloba byònsò bibidì nebijimine, kàdì Dìyì edì kadyàkujiminakù to.” Nè Dìyì edì m'Bukalenge. Eci m'Mfùmù nè Bukalenge, Ndongolwelu, Mwoyi, katùpà nè katùpà kwònsò kàdì ànu munda *Emu*.

¹⁵⁴ Bu Nzambi mwà kulumbulwìshila bàà pa buloba Bèndè ku èkèleeziyà kampàndà, nku èkèleeziyà kaayi kwàbàlumbulwìshilàYe? Yidìkù bùngì kaayi? Nkàmà nè nkàmà nè nkàmà yà èkèleeziyà mishilèshilàngàne yà cyena màngumba. Piikalà beena Kàtòlikè babìngè, nKàtòlikè kaayi? Piikalà Kàtòlikè kàà cyèna Ngelikà kabìngè, dìbà adi kàà cyena Loomò nkapiile. Piikalà kàà cyèna Loomò kabìngè, kàà cyèna Ngelikà nkapiile. Pa nàнку, nudi numòna's, piikalàbì nè ba-Méthodistes mbabìngè, ba-Baptistes mbapiile. Piikalàbì nè ba-Baptistes mbabìngè, beena—beena Mpenta's mbapiile. Piikalà beena Mpenta babìngè, dìbà adi ba-Presbytériens mbapiile. Nwamònu anyi? Pa nàнку's nudi bafwànyìne kupeta cibwejàkàjì cyà menemene.

¹⁵⁵ Kàdì Nzambi kì mmutùshìye katùyì bujaadiki anyi ci—ci—cipiminu cìdì cikèngela bwà twètù kwimanyinapù to. S'n'Dìyì edì! Yèyè kwamba nè: “Dìyì dyà muntu yònsò diikalè mashimi, kàdì Dyànyì diikalè Bulelèlè.” Ncyà bushùwà.

156 Bwalu: “Maulu nè buloba byònsò bibìdì nebijimine.” MbatwámBILE kaaba aka, nè: “Tudi twakidila Bukalenge bùdì kabùyì mwà kunyungishiibwa to.” Èyowà’s, mukalenge. Pààdìshinda makalenge ònsò à pa buloba aa mpindyewu, nè buloba bujimà munkaci mwà kudishinda, kàdì twètù tudi babàtìjìibwe mu Bukalenge bùdì kabùyì mwà kunyungishiibwa nànsha. Amen. Tudi twakidila Bukalenge kampàndà. Pa nànkù, pàdì buloba bùpanduluka, tudi balediibwe mu Bukalenge ebu bùdì kabùyì mwà kupanduluka to. N’Dìyì dyà Cyendèlèlè dyà Nzambì, nè tudi twimanyina pa cyôci aci. Kadyèna mwà kudishindakù to.

157 Tudi tutàmba kuumvwa bikolè bwalu bwà ndongolwelu mupyamùpyà ewu wíkala mwà kutwàla, ndongolwelu wa ntèndeleeu, nudi bamanyè’s, neàtwalè ditalala pa buloba, pàdì beena Kàtòlikè nè beena Mishònyì bònsò badisangishe pàmwè. Bàmwè bàà kùdìbo bàtu biitabuuja dyondopa dyà kùdì Nzambì, bàmwè kabàyi biitabuuja to, nè bàmwè biitabuuja *cikampàndà*, nè bakwàbò biitabuuja *cikansanga*. Nènku bikèngela nùlekelè dikòkangana dyènù dinène nùdì munkaci mwà kukòkangana dībà dyònsò, diitabuuja dyènù dyà butangadiki adi, bwà kubwela mu Nsangilu wa Buloba bujimà. Kàdì’s nebièngela bwà dīgumba nè dīgumba dyònsò dībwelèmu. Pa nànkù, pìikalà dīgumba dyediibwe mulawu, nè bwà kushàala wa mu dyòdì, cidi cyèenza cinyì? Cidi cikwàluja paanyimà. Loomò yèyè mwikàle mamwèndè wa dīgumba, nè yèyè ke nyama wa lwonji nè cimanyinu cyà nyama wa lwonji, dībà adi kumwenzelabò cimfwànyì, nsangilu, maèkèleeziyà ònsò pàmwè àdì ènza cimfwànyì cyà nyama wa lwonji, ke kwalukila buludì ku cimanyinu cyà nyama wa lwonji kàbìdì! Ndongolwelu wa buloba, cyena màngumba, mmupàtùle ndongolwelu bwà kutwàla cimanyinu cyà nyama wa lwonji.

158 Nènku’s nudi nucimòna ànu mùndì ncimòna amu, bwà nè mpindyewu mene necyènzejiiibwè ku bukolè, bwà nè, bònsò bàdì kabàyimù bamana kutèeka mu bulongame abu, màshinyì manène masòmbemù; byamù bilamakaja bìdikù bindile bwà Sàtaanà kubwelamu, nè bukolè bwendeshi abu. Nwamònu anyì? Nènku, pàdìbi byènzeka nànkù, muntu nànsha umwe kèna mwà kuyiisha Èvànjeeliyò to, muntu nànsha umwe, yèyè kàyì wa mu ndongolwelu ewu to. Ke cimanyinu cyà nyama wa lwonji ncyôci aci. Nènku vùlukàayi nè, pa dībà adi, Mukàji-musèla ùkaadi muyè, pa nànkù’s nudi numòna mùdìbi pabwìpì’s. Èyo, pa nànkù nudi numòna mwaba wutùdì’s.

159 Nudi mwà kumòna nè ncinyì’s: dibùnga dinène dyà tulù edi, bintu bìdì munkaci mwà kwenzekamù ebi. “Kaa, tàbulukàayi, nwènù bansantu bàà Mukalenge, bwà cinyì kubùnga tulù pàdì ndekeelu wènda ùseemena apa?” Nudi nocyènza bwà cinyì? Mìngà misangu nudi nusàka ditùkù dyènù dyà ngàsà kule neenù ku mpèkaatù. Kanwènjikù nànkù to. Èyowà’s, mukalenge.

¹⁶⁰ Mpindyewu, ndongolwelu ewu kàadyàkutwàlakù ditalala pa buloba to. Bu cyôci mwà kutwàla ditalala pa buloba, cyàkenzekelà Mfùmù wa Ditalala uvwa Dìyì awu ncinyi? Mmufwilakanyi nè Kilistò mu dilongesha dyèndè. Bidi bibèngangana ànu menemene nè cidi Nzambi ùtwa nyama ku mikòlò, cidiYe mutwàmbile. “Bimanyinu ebi nebifilè aba bàdi biitabuujà,” bàdi bèèla meeji nè aci ndukutukutu. Byenzedi 2.38 ncikwàbò cintu, bwàbò bôbò, kî mbamanyè kantu nànsha kàmwè pa bwalu abu to. Dìyì dyônsò, nè bikwàbò, kî mbamanyè kantu nànsha kàmwè pa Cyôci aci to, nè bàdi bàDivila. Cidi cyùja ànu menemene cyàkambà muprôfetà mu Timôtè Mwibidi, nshapità mwi3 nè: “Nebiiikalè nè mutù mukolè, badibàndishi, biikàle nè cimwènekeli cyà difwàna dyà Nzambi, kàdi bafwànyine kuvila Bukolè bwàdi, mu matùkù à ndekeelu.”

¹⁶¹ Ndongolwelu wa cyena màngumba awu ke cimanyinu cyà nyama wa lwonji. Nutu bamanyè's. Nwènù kanùyìku kacya banguumvwe ncyàmba kumpàlàmpala, ke bwà cinyi ndi mucituute bikolè be. Bwalu mpindyewu ndi ngèèla meeji nè cikondo cikaadi pabwipi nè kujika, pa nànkù's mbipiciibwe nè mèmè kucipàtula nè kwamba Bulelèlè pa bwalu bwàci. S'ki yèyè awu. Ke cimanyinu cyà nyama wa lwonji ncyôci aci, menemene. Loomò's nguvwa nyama wa lwonji awu, nè yèyè ùvwa dîngumba, bulongolodi bwà nzànzànzà.

¹⁶² Nènku tudi bapàtùke munda mwèndè, twètù beena Mpenta, bwà katwikadi baabanyanganyi bàà byôbi abi to; kàdi kwalukila buludì: “ànu mùdì mbwa ku bilùshì byèndè, nè ngulube ku bitoci byèndè,” kwalukilamù buludì. Kabyèna bikèmesha to pàdi ndongolwelu wetù wa beena Mpenta mushiikile, nènku ke mùdì wa ba-Méthodistes, ba-Baptistes, Nsangilu wa Maèkèleeziyà wa Buloba bujimà, nè bônso! Bàdi munkaci mwà kuminyiibwa mu Nsangilu wa Maèkèleeziyà, benza cimanyinu anyi—anyi cimfwànyì cyà nyama wa lwonji, bwà kumupèesha bukolè bwèndè. “Nènku ùvwa nè mutù mutàpa mpùtā wa lufù, kàdi pashiishe mwikàle nè mwoyi,” Loomò wa cimpàngaanù uya ku Loomò wa ciipaapà. Kaa, ekèlekèle, mùshindù mwine ùvwa beena Mishòònyì mpofo's wè! Kàdi's ki nwènù aba, mpindyewu mene basòmbe ànu munkaci mwàci mene. Nè kakwèna cintu nànsha cimwè cinùdiku mwà kwenza mpindyewu to. Ndongolwelu ùkaadi mumanè kwenjiibwa. Nebàcyàngàtè kàdi kabàyi bamanyè nè mbacyàngàtè to. Nebiiikalè anumù, kwàjikì. Kabèèna mwà kupàtukamù to. Cikaadi cimana kwenza.

¹⁶³ Kî ncyenyi kùdì bantu to, nànsha nànkù. Nciyiishiibwe. Vùlukàayi nè, Nzambi wàkafila bujaadiki bwàci, kubùshindika ku Dìyì Dyèndè. Bintu byàkambàYe nè Neènzè abi, Wàkabyènza ànu menemene. Pa nànkù, kakwèna pàà kuingila to. Eyowà.

¹⁶⁴ Mbyamù bilamakaja byà mafi. Ncitwàle bintu ànu menemene cyàkenzà Yesù nè: “Nwènù ku bilèlè byènù nudi bavwije Dìyì dyà Nzambi kadiyì nè bwenzeji to.” Bwà kubènga

kaa, ekèlekèle, nè Mfùmù wetù mwela maanyì pàmwè neetù; tucyònkòmokela pa Dìyì Dyèndè dilaya dyà Bukalenge, dilaaba nè dishindikiibwe munkaci mwètù mene. Amen. Yoyòyò! Ki bwalu mbwòbù abu's, mulayi Wèndè wà Bukalenge muvwijìibwe mulelèla kumpàlà kwètù mene, cintu nànsha cimwè kacyèna mwà kuKuumushakù to. To, mukalenge.

¹⁷¹ Abraham, nànsha mwàkadì mukàjèndè mukùlàkàjì amu, nè yèyè wènda ùkùlakaja dībà dyònsò, kabyàkamutàcishakù nànsha kakesè to. Yèyè kààkatènkakanakù ku mulayi wà Nzambi, ku bupidyà to. Nànsha wèwè wamba nè: “Kabyèna mwà kwenzekakù to. Kèna nè kwàyàye naaci to,” yèyè wàkashàala naaDì, nànsha bishi. Bwà cinyi? Mfùmù ùvwa nendè, ùmuleeja bikèèna-kumòna nè ùmuleeja cìvwà mwà kwenzeka, nènkù byàkenzeka ànu mwàkambàYe amu, nè yèyè kumanya nè ùvwa n’Nzambi.

¹⁷² Nènkù pàdì Nzambi ùfla mulayi nè wèwè muwùmòne, nè Yèyè ùcyàmba nè cyènzeka, nè ùcyàmba nè cyènzeka, nè wàmba, cyènzeka, nè kaciyikù cipangila, n’Nzambi bwà ditùkù adi. Kaa, kucyònkòmokela pa milayi yà mu Dyulu yà Dìyì Dyèndè dilaya bwà cikondo eci, kaa, bamanyè, nè ditwishiiibwa dyà kakùyì mpatà to dyà diitabuuja nè, kùdì kùlwa maulu mapyamàpyà nè buloba bupyabùpyà. Amen. “Dyulu dipyadìpyà nè buloba bupyabùpyà, bwalu dyulu dyà kumpàlà edi nè buloba bwà dyàmbedi nebìjiminè.” Kàdì mu dyulu dipyadìpyà edi nè buloba bupyabùpyà, Pòlò mmwàmbè kaaba aka mu Mukàndà wà Ebèlù, makùmi àbìdì nè-. . . 14.25 nè: yèyè wàkamba nè: “Bwalu tudi twakidila Bukalenge bùdì kabùyì mwà kunyungishiibwa nànsha.” Tudi babwelèmu munyi? Kì nku ndongolwelu wa ntèndeelèlu to; kàdì, Bukalenge bwà Nzambi bùdì munda mwèbè. Bukalenge’s! Mfùmù nè Dìyì Dyèndè bìdì cintu cimwè, nè Dìdì munda mwèbè, munkaci mwà kushindika dībà ditùdì nè mwoyi mpindyewu edi. Mulayi wàkafilà Nzambi bwà cikondo eci awu, s’ki twètù aba, basòmbe nè Mfùmù, basòmbe mu myaba yà mu Dyulu, tuMutàngila wènzà bintu ebi.

¹⁷³ Kàdì mmunyi mutùdìku mwà kukoma nyimà ku Dìyì adi, kuya ku ndongolwelu kampàndà’s? Cìdì cyènzà cinyi? Cìdì cìvila Dìyì. Bikèngela witabe, ùbenge Bulelèlèla kumpàlà kwà wèwè kwitaba cilèma. Ncyà bushùwà menemene. Nudi nwitabuuja nànkù anyi? [Disangisha dìdì dyàmba nè: “Amen.”—Muf.]

¹⁷⁴ Dībà ditùdì nè mwoyi edi, Éyì Nzambi wa yààya, buloba bùdì munkaci mwà kudishinda’s! Nkulembeleja mu bitanda mwàmwa, mabombè, nkulembeleja cintu cyà kwenza ànu naaci menemene muntwamu.

¹⁷⁵ Èkèleeziyà ùkaadi mudìlongòlòle. Mmutwibwe cìtampì munda, mudìlongòlòle bwà kulwa. Nekwikalè dipòngoloka dinène dyà Nyumà, èyowà’s, mukalenge, bwà kwambula Èkèleeziyà awu nè kuMubweja mu maulu. Menemene’s. Bwalu,

nwamònu's, Èkèleeziyà, Dîyì, Mukàjì-musèla. . . Nènku, Kilistò, mudimu Wèndè wà bwambi wùdi mu Mukàj'Endè-musèla, ùdi mwikàle Mubidi Wèndè, Mubidi wà mu dyulu, anyi ndi njinga kwamba nè, Mubidi Wèndè wà—wà mutàmbe-mfùkilu awu mwaba ewu pa mubidi wà nyumà pa buloba, Nyumà Wèndè ùdi munda amu munkacì mwà kupàtula Mwoyi Wèndè patòòke, too nè pàdi Yèyè nè Èkèleeziyà bàlwa umwe mu dibàkà. Nwamònu's, bàdi bàlwa umwe. Ùdi ùbàngata, ànu banyààbanyà bakesè mu matùkù à ndekeelu.

¹⁷⁶ Nè pashìishe bavirgò bònsò bàvwà balààle tulù abu, munda mwà bikondo, bààkabiika bònsò ku lufù, nudi numòna's. Mpindyewu, aci mmu cilù cyà mwandamutekète, cikondo cyà mwandamutekète cyà èkèleeziyà, cikondo cyà ndekeelu, cyà nshìikidilu, Laòdikiyà, ku ndekeelu, pààkabwelamù ànu kasumbù kààbò kakesè. Kàdi, cidi citwàla dibìikà dyònsò dyà ku lufù dyà bònsò bààkafwà mu bikondo byàbò abu, biikàle nè mwoyi ku Dîyì divwà dilongolola kùdi Nzambì nè diyishìibwe bwà kwenzeka mu ditùkù adi, bu mutùdi bayiile bikondo byà èkèleeziyà abi nè bamòne ànu menemene Dîyì divwà mwà kutwilangana naabò mu kikondo aci; mwàkajuukà Luther, mutùdi tujandula, mu cikondo cyà Luther, kupàtukakù nyama mwenze bu mpàla wa muntu, nè kupàtukakù, ewu uvwa “mwakajuludi,” mbwena kwamba nè *muntu*. Nènku, pàdibi nè, bikondo byònsò, cyònsò cìvwa cìkùmbanangana ànu menemene nè mishìngà yà Dîyì dyà Nzambì.

¹⁷⁷ Nènku ki mwàkumbananganabi ànu menemene nè cimanyinu nè bwalu bwà kukèma nè cintu cidi Nzambì mulayè bwà kwenza mu matùkù à ndekeelu aa. Nè Èkèleeziyà Yèyè mwinè neikalè mudilongòlòle nè neàye mu Dyambwibwa nè Yesù, bwalu: “Tudi twakidila Bukalenge bùdi kabùyì mwà kunyungishiibwa to. Kabwèna mwà kunyungishiibwakù to. Maulu nè buloba nebìjiminè, kàdi Bukalenge ebu kabwàdyàkujiminakù to.” Amen. Ndi nè disànkà dyà kwikala, dilòòlò edi, amen, dilòòlò edi, mu Bukalenge abu. Kanwènaayikù nè disànkà dyà kwikalaMù anyi? [Disangisha didi dyàmba nè: “Amen.”—Muf.] Kaa, èkèlekèle, bwà kwikala mu Bukalenge, Aci's!

¹⁷⁸ Elàngàna ànu meeji's, ncinyì cyùdiku mwà kudìlaya leelù ewu? Mu bidimu bikwàbò dikumi too nè ku dikumi nè bitaanu, bu buloba mwà kwimana, bu byòbì mwà kutwàla nànkù, muntu yònsò mu Shreveport, mukàjì yònsò, nebikukèngèlè bwà wèwè kwambula cingoma, mu mùsèèsù, pàmwè neebè, mu mpaayà mwèbè, bwà kudikùba wèwè mwinè. Bangòndàvi's! Mmunyi muwàciimanyikà? Citèetebì's. Èè, cyònsò nkòong. . .

¹⁷⁹ Mwà nsanganyibwa mu New York, lumingu lukwàbò alu. Ki mèmè kupweka kuntwaku, mu ntàntà wa kilòmèètà, kakùvwa cintu cìkwàbò to ànu bangòndàvi bàà bitende aba biikàle nè tukànu ku maci, nè nsukì milamika, balwàte tundamata, nè

bàna bàà bakàji balwàte tuubikini tukesè, mùdìbo bàcibiikila, babilwàte mùshindù awu, bapàtùke mu mùsèèsù. Nè bantu bònsò bàdi nè cyà kubàpèèsha bukenji bwà kupita. Kaa, mbwalu kaayi ebu nè ditùnga edi's wè? Mbwalu cidi—ncimanyinu cyà ditùnga dyà nsòmbelu wa kanyawù, dibèngiibwe kùdi Nzambi. Ke cyònsò cìdiku.

¹⁸⁰ Mmunyi munùdi mwà kwibakila pa makàlà à bimanu byupùke mùshindù awu? Mmunyi munwàcyenzà, pàdi bangòndàvì munkaci mwà kwendakana mu mùsèèsù nè kwashila Mfùmù wa ditùnga mene ku cingoma ànu mu kàshinyi kèndè amu?

¹⁸¹ Nènkù dilòòlò dikwàbò, muntu kampàndà wa ku nzùbu wa dilààdikilamù màshinyi, mubànde kuntwaku bwà bwimvi nè bikwàbò, kubwelaye ànu buludì nè kutùpikila kumpàlà kwà bampùlushi bàà mu Texas nè bantu bapite pa lukàmà nè byà mu njila biimàne mwaba awu, kubwelayemu; nè bantu bònsò bamutàngile, kupàtula cingoma cyèndè nè kwasayè muntu kampàndà mu dishebeyanga dyà cikisu, kàdi kupàtuka kuya. Yèyè's nèàdibingishè nè “mmupàle,” nè kumulekelabò.

¹⁸² Ànu mu cimenga cyètù, muntu kampàndà kuditwayè mu cilogolwedi cyà màshinyi kampàndà, dikwàbò adi, mu kasùmbù kakesè kàà baakwidi bàà beena mudimu, nè kwangata mu—mu—muntu kampàndà ùvwa musùmbishidyanganyi wa màshinyi. Yèyè kàvwa mumuswè to, ke kutùlayè ànu cingoma nè kumwasa, misangu yìnaayi anyi yìtaanu. Kàdi kwambayè mùvwàye mupàle; kumulekelabò yèyè kuya. Cyòci ciikale “dipaala” didìbo bamwakwile naadi, dîbà adi Oswald pèndè ùvwa nè mpùngà, s'bìvwa bikèngela kupetayè mpùngà wa kumwakwilabò nè ùvwa mupàle.

¹⁸³ Ncinyi ciine aci, nànsha nànkù? Nudi numòna kùdici's, cintu cyònsò mu kaabujimà mmusùmbà munène wà dinyanguka! Cintu cyònsò mu kaabujimà ncipiile, nè buloba bujimà mbwimàne bupiiile, nè èkèleeziyà mmwimàne mupiiile kumpàlà kwà Nzambi. Amen. Kabyèna bikèmesha to patùdi munkaci mwà kupanduluka!

Tùsambilàayi.

¹⁸⁴ Mukalenge Nzambi, ke twètù aba. Dîbà dyàkùmbanyi, Taatù. Dîbà didi mwà kwikala dimanè kuya kupita mutùdi twètù twela meeji. Pàmwàpa dinyanguka nditàmbe kudyàdijamù, nè mukùmbi wà yelèkè mmudye, nè mukùmbi wà hazilà, mu mùshindù wà nè Mwoyi wònsò wùkaadi muyè. Ndi nKulòmba, Mukalenge, bwà kwikala nè luse. Enzàku, Mukalenge, nè kwòkò mulùme anyi mukàji, mwànà wa balùme anyi wa bakàji, mu Bwikadi mpindyewu, udi kàyi muKumanyè to, bwà bààKwitabakù mpindyewu mene, Taatù. Ncìfwànyine kwikala dìnà dyà ndekeelu diikalàku mwà kuya mu Mukàndà, dipatukila mu Shreveport.

185 Nènku patùcìdì nè mitù yètù miinyika apa. Kùdikù muntu kaaba aka muswè kwela cyanza cyèndè muulu, wàmba nè: “Mwanèètù Branham, ndi mutwìshìibwe ànu menemene nè ciwàmbì aci ncyà bushùwà. Buloba bùdi munkacì mwà kudishinda, nè tudi twakidila Bukalenge bùdì kabùyì mwà kudishinda to. Nènku, bwànyì mèmè, ncyèna mutwìshìibwe bwà nè ndi mu Bukalenge abu, anyì to.”

186 Kwèyemenyikù pa byà nè uvwa mupete disaluka dyà mùshindù kampàndà to. Kwèyemenyikù pa nè udi mwakùle mu myakulu to. Mèmè ntu ngiitabuuja bintu abi. Cyà bushùwà, ntu ngiitabuuja mu dyakula dyà mu myakulu. Kàdi nkàadiku muumvùmvwe démons yàkula mu myakulu nè yifila dyandamuna ku cyòci aci, yifùnda mu myakulu myenyi, baloji, nwamònu's. Kwèna mwà kunangila aci to.

187 Kàdi Mwoyi wà Yesù Kilistò wòwò munda mwèbè, neWùshaalè nè mwoyi Wòwò mwinè, mwikàle wìtabuuja Dìyì dyònsò dyà Nzambì. Bwalu, Yèyè kèna mwà kuDìvilakù Yèyè mwinè to, Yèyè ùdi Dìyì.

188 Mpindyewu, pìikalàYe ùdi Dìyì, nè Yèyè mwikàle munda mwèbè, nènku dībà adi wèwè udi wamba nè: “Èè, Mwanèètù Branham, ndi nkwambila nè, ncyèna ànu mwà kwangata Aci to. Ncyèna ngiitabuuja Eci to, nè bintu ebi bìdi bwà ditùkù edi,” kàdi's ke Cyòci eci cilayìibwe bwà ditùkù edi, kaa, mwanèètù wanyì, udi museeswìshìibwe. Nyumà kampàndà mmukutwè byanza nè mukuseeswishe.

189 Inàbànzà, pawìkalà wèwè, anyì muntu mulùme, anyì ní udi nganyì, pìikalà bintu bìdì bilelèlà abi, bilelèlà mu Dìyì, byàkafwilà Yesù Kilistò abi; kî ng'ànu bwà kwikala nè èkèleeziyà anyì kwikala nè mushikì wà disaluka to, kàdi bwà kwikala nè musùmbà wùdì nè Nyumà Wendè, musòmbèle munda Mwèndè; Mukàj'Èndè-musèla, Dìyì Dyèndè dìdimù, Dìyì dyònsò ndilelèlà. Nè wèwè udi mumanyè nè kaCyèna cìkwàta mudimu mu wèwè mùshindù awu to, udi mumanyè nè kùdi bintu, mu Bible, byùdì kùyì ànu mwà kwitabuuja nè bìdi nànkù to; kàdi wèwè muswè bwà bàkuvùlùkè mu disambila. Mpindyewu nè dísù dyònsò dibwita, mutu wònsò mwinyika, ndi ndìkonka, pa dībà dìdì dimane kupita edi pàdì . . .

190 Bìdi mwà kwikala nè cikondo cyà ditwila myandà ncimane kupita, nwamònu's, bwalu nekùlwe cikondo cyà mùshindù awu pìikalà Nyumà wa Nzambì muumùshìibwe pa buloba, kààkwikalakù kàbìdì to. Èkèleeziyà nèàshaale katanci, ncyà bushùwà, munkacì mwà kuyiisha, bwalu bìdi bikèngela bwà yèyè kuyiisha bajìmine Cyèndèlèlèlè, ànu mwàkenza mudimu wònsò wà bwambi, munda mwà bikondo byònsò. Citùpà cyà ndekeelu cyà mudimu wònsò wà bwambi cyàkayiisha bajìmine Cyèndèlèlèlè. Nènku nekwikale mudimu wà bwambi mpindyewu

wikalà mwà kuyiisha bajimine Cyendèlèlè paanyimà pàà bôbô bamanè kubenga kuWàkidila.

¹⁹¹ Kàdi kwókò kùcidi ànu kùmwèka bu nè kùdi kantòlantòla mu mwoyi wèbè, mu mùshindù wà nè udi muswè kwikala nè Kilistò munda mwèbè amu, nè buloba bujimà bufwè, udikù mwà kwela cyanza cyèbè muulu, kwamba nè: “Wamvùlukakù mu disambila, Mwanèètù Branham.” Mukalenge ànùbènèshè. Eyowà, èyowà, byanza dikùmi anyi dikùmi nè bitaanu. Nkufwànyinekù kwikala mukwàbò kumpàlà kwà twètù kusambila anyi? Mpindyewu tukàadi pabwipi nè kujikija, mu tusunsu tutwè ku túbidi anyi túsàtù. Nzambi àkubènèshè, wèwè nsongààkàjì.

¹⁹² Anji elàngààayi ànu meeji pa bwalu abu, elàayibi meeji pa bwalu abu, ambàbi tũng bu díbà mwà kwikala dimanè kupita? Ambàbi tũng bu wèwè mwikàle muntu wa ndekeelu wíkalaYè mwà kukookola ku ciibi?

¹⁹³ Bùdi munkaci mwà kudishinda, aci tudi bamanyè. Kwèna mwà kushààla apa to, aci's ncintu cyà bushùwà. Kwèna mwà kushààla apa to. Neùye. Cifunde wèwè ànu cyanàànà, neùye. Nèku pawikalà . . .

¹⁹⁴ Kwikadi ànu musalùke to. Kwambi nè: “Ndi wa mu èkèleeziyà to.” Ikàlà mutwishùbwe bwà Cyôci aci. Kilistò Yèye kàyi musòmbèle munda mwèbè, munda mwèbè, too nè paùdi. . . meeji èbè ònsò, mwoyi, musùùkà, mubidi.

¹⁹⁵ Wèwè, udi wamba nè: “Èè, mémè's ndi ngèèla meeji nè. . .” Kwèna nè meeji àdi nè mushing to, mwanèètù. Meeji àvwà mu Kilistò awu ikalè munda mwènù! “Ndi ngèèla meeji nè matùkù kaàvwa nè cyà kwikala. . . Ndi ngèèla meeji nè kabivwa bikèngela bwà *cikampàndà* kwikalaci nànkù to. Ndi ngèèla meeji nè Dìyì kadyèna dìswa kwamba *cikampàndà* to.” Katwèna nè meeji àdi nè mushinga to.

¹⁹⁶ Piikalà meeji à Kilistò munda mwètù, díbà adi netùjingululè nè Dìyì adi m'Bulelèlè, nè Dyôdi didi nè mwoyi ànu munda mwètù mene. Kwèna mwà kupanga kucyènza to, Didi n'Kilistò!

¹⁹⁷ Pàtulà mwoyi mu mwonji wà cibimbi nè uwùtèèkè mu mwonji wà diwòji, newùkwamè bibimbi. Kwèna mwà kuwùpangisha kucyènza to, bwalu's ke mwoyi wùdi munda amu.

¹⁹⁸ Kàdi wèwè—kàdi wèwè wamba nè: “Èè, mémè ncyèna ngìtabuuja Aci to, Dìyì edi—edi,” díbà adi aci kí n'Nyumà wa Kilistò to. Nwamònu's, kùdi nyumà mukwàbò kampàndà munda mwèbè amu.

¹⁹⁹ Kùdikù mukwàbò kumpàlà kwà twètù kusambila anyi? Nzambi àkubènèshè. Nzambi àkubènèshè, nè wèwè, wèwè. Eyowà, abi's mbimpè. Mpindyewu, muntu mukwàbò, katanci kakesè cyanàànà mpindyewu. Nzambi àkubènèshè, wèwè

nsongààlùmè. Wèwè, inábànzà mutekète. Wèwè, mwanèètù wa bakàji. Nzambi àkubènèshè, nè wèwè. Èyo, kùdikù mukwàbò anyi? Nzambi àkubènèshè, lwà paanyimà pààpa.

²⁰⁰ Mpindyewu kùciinyi to. Kùumvu bundù mpindyewu to. Maaalabà dilòòlò dîbà ndifwànyine kwikala dimanè kupita bikolè. Nwamònu anyi? Mbifwànyine kwikala dilòòlò edi diikala mwoyi awu mwà kwimanyika dituuta. Mbifwànyine kwikala nè dilòòlò edi ùMubèngè, musangu wèbè wà ndekeelu.

²⁰¹ Mbanganyì mwab'ewu bàdì kabàyi nè dibàtiiza dyà Nyumà Mwîmpè, elàayi byanza muulu, udi mumanyè nè—nè kwèna Nendè to anyi? Ekèlekè! Ke mùshindù wùdi ubwela ngwòwò awu. Nyumà Mwîmpè n'Kilistò. Mùshindù awu ke wùdi mutwibwe citampì mu Bukalenge, Efèsò 4.30: “Kanùbungamiji Nyumà Mwîmpè wa Nzambi to, unùdi batwibwe nendè citampì too nè ku ditùkù dyà bupikudi bwènù.” Nènku wèwè—nènku wèwè nè meeji à Bible ewu, bwà nè Kí mmulelèlè to, dîbà adi nyumà udi munda mwèbè kî n'Kilistò to, bwalu Kilistò ùdi Dîyi.

²⁰² Ke Bukalenge bùdì kabùyì mwà kunyungishiibwa mbwòbù abù's, ke Dîyi adi. Ke Bukalenge bùdì kabùyì mwà kunyungishiibwakù to. “Maulu nè buloba nebijimine, kàdi Dîyi Dyànyì kadyàkujiminakù to.” Dîyi dyòdì munda mwènù! “Nwènù bashààle munda Mwànyì, nè Dîyi Dyànyì munda mwènù; nùlombè cinùdì baswè, nebànwènzèlèci. Byenzedi bìndi Mèmè ngèza,” Yone Munsantu 12.14, “byenzedi bìNdi ngèza, nenùbyènzè pèènù; byàbùngì mene bipite ebi, bwalu Ndi nya ku Taatù. Mu katanci kakesè emu, bàà pa buloba kabàakuMmòna kàbìdì to; kàdi nwènù nenùMmònè, bwalu Nèngiikalè neenù, munda mwènù mene, too nè ku ndekeelu kwà buloba.”

²⁰³ Tàngilàayi numòne cìvwà byenzedi Byèndè, numòne ní mbitwalùkidile mu matùkù à ndekeelu. MbaCìbènga anyi? Buloba bujimà! Nè buloba bùdì munkacì mwà kudishinda cyàkàbìdì, mu Noël ewu, ànu mwàkadibi ku Noël awu.

²⁰⁴ Taatù wetù wa mu Dyulu, kùdi byanza byàbùngì byela muulu kaaba aka dilòòlò edi, pàmwàpa makùmi àsàtù anyi makùmi ànaayi, mu kasùmbù kakesè kàà bantu aka, byela muulu dilòòlò edi, nè bàvwa bamanyè nè kabàvwa ànu mwaba wùvwà wùkèngelà kwikalabò to. Bàvwa bamanyè nè Wèwè kùvwa musòmbe munda mwàbò to, mu Cipiminu. Bàmwè, pàmwàpa cintu kampàndà mu Bible, bàdi bàmba nè: “Ndi ànu. . . Ndi—ndi—ndi nCìitaba bwalu ndi—ndi ànu ngèela meeji nè pàmwàpa bìvwa bikèngela mèmè kwenza nànkù.”

²⁰⁵ Kàdi, Mukalenge, Wèwè wàkalaya nè Wèwè newìkalè Dîyi, nè Wèwè udi Dîyi. “Nènku Nèndwe kunùdì, nè kuDimanyisha kunùdì.” Tudi tusangana nè ndongolwelu Yèbè, ndongolwelu Webè, kàtu ùshintulukakù to.

206 Paùdi ubwela mu Dipungila Dikùlukulu, Wêwê wâkamba nè: “Dìyì divwa dilwa kùdi bapròfetà.” Nènku pààkenzàDi nàнку, bààkamba cipròfetà nè Kwenzekaci, bwalu Cìvwa n’Nzambi.

207 Mpindyewu tudi tusangana nè paWakatùtùma, nè kutùtùma nè mudimu bwà kuya mu buloba bujimà nè kuvwija bayiidi, nè Wêwê wâkamba nè: “Pàdì Yêyê Nyumà Mwimpè ùlwa pambidi pèèbè, Yêyê neàtwalè bintu bìNdì munùlongèshe ebi, ku civùlukilu cyènù.” Mbwenà kwamba nè, cyàkàbìdì’s! “Nè neànùleejè maalu àcilwalwà.” Cyàkàbìdì’s! “Nzambi, mu bikondo byà kale nè mu mîshindù mîshîlèshîlàngàne wàkaakwila nè baataatù ku bapròfetà; mu matùkù à ndekeelu aa ku Mwân’Endè, Kilistò Yesù.” Nyumà Mwimpè Yêyê mwînè, ùlwa, Mubuludi wa Dìyì difùnda, nè Muleeji wa bintu bicilwalwà’s! Mbambè nè: “Dìyì dyà Nzambi,” mu Ebèlù 4, “nditwè kutàmba mwelè wà mvità wà mutwîsha nseke yìbìdì, Dijinguludi dyà meeji àdì mu mwoyi.”

208 Nènku muntu mubiipe nè wa mu èkèleeziyà, leelù ewu, ùdi mwà kusòmba nè kuKumòna wenza cintu cimwècimwè aci, kàdi kuCibiikila nè nnyumà *mubi*, ànu mwàkenzàbo mu matùkù à kale amu. “Piikalàbo bàbiikila Mfùmù wa nzùbu nè ‘Beelèzèbùlà,’” kàdi’s tudi tucimòna.

209 Mukalenge Nzambi, ncinyi cikwàbò citùdiku mwà kwenza mpindyewu? Kùdi myoyi yìdì nè nzala mwab’ewu yìdì myelè byanza byàyi muulu. Yangàtekù ànu mpindyewu, Mukalenge, ùjàku mwoyi wònsò nè dinanga Dyèbè. Enzàku nàнку.

210 Nènku patùcidì nè mitù yètù miinyika apa, bu nwènù bàdì beelè byanza muulu abu mwà kuswà bwà kuseemena pabwìpì nè cibùmbà cyà ku cyambilu eku, kanù—kanùcìlààdikijikù to, nwamònu’s, ànu bwà mutanci wùdì wùlonda mpindyewu ewu, juukilaayi ànu kuulu, nè lùkàsà lwònsò, nè lwàyi kùnweku, imànaayi ànu kuulu. Edì ndifwànyine kwikala dilòlò dinùdì nupeta Nyumà Mwîmpè.

211 Balundà bàànyì, tàngilàayi, eci kacýàkutùngunukakù díbà dyònsò to. Cìdì, necìjikè. Cìdì mukaci mwà kujika mpindyewu mene, nè cìdì mwà kwikala cimana kujikija. Kàdi paùdi ànu uteeta bwà kujinga kufika kùdì Kilistò, díbà adì’s kùcìdì ànu cintu kampàndà mwaba awu, kàbìdì, ciikàle cikukòka mùshindù awu.

212 Kwênakù mwà kulwa mpindyewu nè kwimana ànu kaaba aka bwà disambila anyì? Nwènù bàdì bàjinga nàнку awu abu, nudi mwà kulwa buludi kunyùngulukila ku cyoshelu eku, ànu bwà katanci kakesè, patùcidì nè mitù yètù miinyika apa. Mpindyewu bantu bàdì munkaci mwà kulwa kumpàlà eku. Ncyà bushùwà, bàndaayi buludì kumpàlà eku ku nyùngulukilu wa cyoshelu eku. Wêwê udi wamba nè: “Buloba bùdì munkaci mwà kudishinda, mèmè ncyèna muswè maalu à buloba munda

mwànyì to. Ndi muswè Bukalenge munda mwànyì, bùdì kabùyì mwà kudishindaku to.”

213 Yesù wàkamba nè: “Kakwèna cintu nànsa cìmwè cyàjìmina to. Mèmè nèncijuulè cyàkàbìdì ku matùkù à ndekeelu. Èyowà, Nèncijuulè.” Yèyè mmulayè, nànkù kanwèna mwà kudishinda to. Nzambi nèncijuulè. Nànsa ciikàlè cinyì, Yèyè nèncijuulè.

214 Nuvwakù bamanyè nè kakwèna cintu nànsa cìmwè cìdì mwà kubutudiibwa kùdì muntu anyì? Cintu nànsa cìmwè kacyèna mwà kubutudiibwa to. Wèwè udi wamba nè: “Kàdi udi wamba bìshi bwà kapyà, pàdiku kwòsha cintu kampàndà apu?” Kakèèna kàcibùtula to. Cìdì ànu ntupwishipwishi atu muntwamu tùdì tùsùsulula mishindà ayi, nènku wèwè kupeta luuya lwàcì alu. Cìdì cyàlukila buludì ku ngiikàdìlù wacì wa ku cibangidilu, mùshindù wùvwàcì ku cibangidilu awu; àsiidè, gázè, makènkè, nè bikwàbò, ànu mùvwàbì amu. Kwèna mwà kubùtula cintu nànsa cìmwè to. Bu—bu buloba mwà kunèngà ntàntà mukùmbàne, ncifwànyìne kwalukila buludì ku katùpà kakwàbò kàà dibèji, anyì mucì mukwàbò, anyì cyònsò cyùdì wosha aci. Nwamònu’s, kwèna mwà kucibùtula to. Nzambi ngudi mucyènzè nànkù.

215 Kaa, kwèna mwà kubùtula bufùkì bwà Nzambi to, ncyà bushùwà menemene, pa nànkù ambààyaaku tǔng mùdìYe mwà kutàmba kubiisha cìdìYe mulayè’s!

216 Kwèna muswè kulwa anyì? Nekwikalè bakwàbò kàbìdì mpindyewu anyì? Kùdì kasùmbu kakesè mwab’ewu, kabàyì cyàbìbìdì cyà bàvwà beelè byanza muulu to. Mvwa ndyàmbidila nè nuwà nwambidilamù panùvwà beelè byanza byènu muulu apu, nangàngà pa Mukenji bu nànkù.

217 Mbanganyì bàà kunùdì mwaba ewu, mpindyewu nè mitù yènu miinyika, bàdì bamanyè eci nè, nudi bamòne Nzambi mukwàte ku mulayi Wèndè, pa cibùmbà cyà ku cyambilu apa mene, nè mumanye maalu masokòme à mu mwoyi? Wùmwè, musangu nànsa wùmwè Yèyè kàtukù mwanji kwamba cintu nànsa cìmwè cìdì kaciyì cyènzèke to. Nudi bamanyè nè aci ncilelèlè. Mu masangisha, myaba yònsò, ànu menemene cyàkenzà Yesù Kilistò pàvwàYe pa buloba apa, Yèyè mmucyènzè kàbìdì. Aci’s nudi bamanyè. Nudi bacimanyè. Mvwa ngèèla meeji ku dyondopiibwa Dyèndè.

218 Kùkaadi mbingu yìbìdì, kumpàlà kwà mèmè kuya ku New York, kùvwà inàbànzà kampàndà wàkalwa nè kànsèrè pa mumìnu. Nyumà Mwìmpè kwakula nendè, mu disangisha amu. Úvwà mwab’ewu kuntu kwàka, dyàlumingu, mwikàlè nè kànsèrè kajìngila mu lubondya, úvwà mukàkòsòle kamatè. Bangàngàbukà kukàtàngila, nè kwamba nè: “Mwoyi kupàtukawù mu kànsèrè, nènku kudilekelakù.” Kàdi yèyè kukàkòsola kumatakù.

219 Mukwàbò ùvwa nè kànsèrè mu tujilu twà bukàji. Nènkù ùvwa naakù mwaba awu, mwikale nè fòtò mwalabàle, nè díyì dyà ngàngàbukà difùndapù. Kàvwa kamulòpòke paanyimà pàà matùkù àbìdì.

220 Muntu mukesè mwimàne mwaba awu, uvwa kàyì nè civùlukilu to, munda mwà—munda mwà ngondo nè ngondo nè ngondo. Ùvwa mudishinde nè kabonkoshi kàmusaama. Kàvwa mene mudimanyè anyi nè mpenyi pàvwaye ùsanganyibwa to. Ànu nè mwàkù wà disambila, nè kumutentekela byanza, Mémè nè: “Dyèbè nganyì?”

Yèyè nè: “Billy Dukes.”

Mémè nè: “Wèwè udi nè bidimu bìngà?”

Yèyè nè: “Bidimu citèemà.” Yèyè nè: “Ndi penyi?”

221 Bukolè bwà Nzambi's! Mvw'a kujinga bwà nwìkalakù naanyì mu Colorado, kùkaadi ndambù wa mbingu, pààkenzeka cintu kampàndà civwà mwà kukunyùkusha, bwà kumanya nè civwa ncinyi. Tukàadi ku cikondo cyà nshìikidilu, mulundà wanyì.

Kanwìkadi, kanùlààdikiji eci ntàntà mule to. Lwâyì. Kwòkò kwikàle mukwàbò mwab'ewu, lwàkù. Nudikù mwà kuswà anyi? Nudikù mwà kulwa anyi?

222 Mpindyewu, wèwè kùyì ulwa to, wamònu's, ncyèna—ncyèna mwà kucyèna to, ndi—ndi—ndi—ndi... Cyònsò cìndì mwà kwenza cìdì ànu kunwàmbila Bulelèlà cyanààna, nwamònu's, díbà adi bwalu mbulààlè kùdì. Ànu bu Noà, wàkabwela, bwàtù kumukàngila munda, cintu nànsha cìmwè kacyàkenzekakù to bwà katanci kakesè; kàdì bàà pa buloba bààkabùtuka pambèlu apu, nè bàà pa buloba bààkatùngunuka ànu nè kwikala nè mwoyi mùshindù wùmwèwùmwè awu. Nwamònu anyi?

223 Pilaatù wàkatùngunuka buludì, paanyimà pàà yèyè mumanè kupoopela Yesù pa nkùrusè. Nènyiishè pa cyòci aci, mu ndambù wa malòòlò, “mashi pa byanza byèbè,” bu Mukalenge mwà kwanyisha.

Mònaayi mpindyewu, kùdikù mukwàbò, kumpàlà kwà twètù kujikija anyi?

224 Mpindyewu nêndombèku bakàji nè balùme bàdì badilàmbùle menemene, bàdì bamanyè Nzambi, bwà kulwabò kwimana mwab'ewu nè kutentekela bantu aba byanza. Eci ncifwànyine kwikala musangu wà ndekeelu wìkalàbo mwà kupeta mpùngà ewu. Bàmwè bàà ku nwènù bantu badilàmbùle bàdì bamanyè Nzambi abu, lwâyì nè nwìmanè nè bantu aba. Bàdì nè twartà tukùnzùbile pambidi, pàmwè nè muntu yònsò wa kùdìbo, mbwena kwamba nè bàdì, mbeenyi munkaci mwènù. Ngèèla meeji nè aci ncyà bushùwà. Lwâyì, nubàtentèkèlè byanza. Bàmwè bàà ku bidimba byà mu Life Tabernacle, bàlwe mwab'ewu. Bàmwè bàà kunùdì nwènù bàna bèètù bàdì

mwab'ewu aba nudi baswè kulwa anyi? Lwâyì, ke dîbà ndyôdi edi. Kanwènaayikù—kanwènaayikù banangè eci anyi, nwènù cisàmbà? Ekèlekèlè! Lukunukunu lwètù lùdi penyì's? Cintu kampàndà cidi citùsàka aci cyèpì? Mbwalu kaayi ebu's?

Mpindyewu bu batèèleji mwà kwindilakù katanci kakesè cyanààna, bwà disambila edi.

²²⁵ Nwènù bàdì biimàne mwab'ewu aba, mpindyewu tàngilàayi, kanwèyemenyi disaluka kampàndà to, nànsha mùdìbì nè dìdì nè disaluka mu Cyôci aci. Kanwèyemenyi pa nè nudi nwakula mu myakulu, anyi to. Kanwèdikù meeji ku bwalu nànsha bùmwe to. Nzambì neàtangilè bwalu abu, nwamònu's. Wèwè lòmba bwà Yesù Kilistò àbwelè mu mwoyi wèbè nè àsombelè Yèyè mwinè munda mwèbè. Kùcyèna kàbìdì muswè meeji èbè wèwè mwinè to. Udi muswè meeji Èndè Yèyè. "Meeji àvwà mu Kilistò awu ikalè munda mwènù." Kaa, eci cidi. . .

²²⁶ Eci, èè, newìkalè ànu mwà kuumvwa bintu ebi bwà musangu wà ndekeelu, musangu kampànda. Mpindyewu tàngilàayi, ndi muswè bwà batèèleji bônso bàjuukilè kuulu, kunùdì aku. Mpindyewu, nwènù bananga bàdì balwè kaaba aka bwà dibàtiiza dyà Nyumà Mwimpè aba, mààlabà ngwa Disàkidila, kakwèna byà dikwàta mudimu mààlabà to. Eci mbwà musùukà wèbè, mwanèètù wa balùme, mwanèètù wa bakàjì. Eci ke kwèbè kùyaaya kwà Cyendèlèlèlè. Eci, cidi anyi mpindyewu anyi kashidi. Nènku paùdì ànu umvwa dikòkiibwa dikesè dimwèpelè adi! Kàdì anjì elàayibì meeji ku Malelèlè aa, Ngòwò aa àsanganyibwa ànu kumpàlà kwètù mene. Kanwikadi bafwè pa bintu abi to, balùmyàna wa yààya. Ncilelèlè. Ncijaadikiibwe, cilelèlè, cipwàngàne, musangu wónsò. Nènku n'Díyì, dishìndikiibwe's!

²²⁷ Ndi ntàngila muntu kampàndà mwimàne ànu kaaba aka. Ncyèna mwà kuvùluka dîna dyèndè to. Ngèèla meeji nè m'Blair, Révérend Blair. Pâmvwà nsanganyibwa ku Hot Springs kwàka, ànu àbìdì àdì panshì aa, mémè kubàkula mwaba awu mu batèèleji amu, muntu uvwa musòmbe mwaba awu awu, nè nyumà mubì ùvwa ùteeta kufika kùdì muntu awu, bwà kumufikisha ku dingeela mpatà. Mpindyewu tàngilàayi nùmonè cyàkenzekà. Mémè nè: "Udi mufwànyine kwikala naanyì dijìnga musangu kampàndà, wamònu's." Kwakenza ànu mbingu mikesè cyanààna mukàjèndè kumbiikilàye, muntu awu ùvwa ùpunga nè lufù. Nwamònu anyi?

²²⁸ Ke muntu awu kwitabayè, kumanyayè dîbà adi nè ùvwa ndyabùlù ùteeta bwà kumufikisha ku diitabuuja nè Cìvwa ndìyelè dyà mùshindù kampàndà anyi cintu kampàndà. "Kàdì mmunyi mùdiye mufwànyine kumanya aci's?" mwàkadyàmbidilàye. Ke dîbà adi yèyè. . . Ku disambila twètù kwipata bubì mu yèyè.

229 Nè pashiishe kùkaadi ndambù wa mbingu, nwamònu's, Sàtaanà ùvwa mumanyè nè cikondo aci cìvwa munkaci mwà kulwa, mùvwàye mwà kwikala mulààle mwaba awu nè cyûjà mu lubadi lwèndè, ngèèla meeji mmwàkamba mukàjèndè, anyi cintu kampàndà, mwikàle nè mubidi kapyà wèbè wà ngwengwengwe, lungènyi lumujimine mu mutù; kàyì mumanyè nè cìvwàku ncinyi to, twìshì kampàndà mu lubadi, tumùje lubadi lwàmba kutaayika. Ke mukàjèndè mukesè awu kumbiikilayè ku Tucson. Mémè nè: "Mwanèètù wa bakàji, udikù nè mùshwàlà anyi?" Ngèèla meeji nè ùvwa nè cintu kampàndà kuntwaku, cìtàmbalà cikesè anyi cintu kampàndà. Mémè nè: "Ndi—ndi mwà kucimòna. Angàta cintu eci ùcìtentèkèlè Mwanèètù Blair, mu Dìnà dyà Mukalenge Yesù." Kàdi's wàkadi mumulòmbe bwà kulwa kubiikila.

230 Ambàbi tǔng bu Sàtaanà mwà kwikala mutuutè dyàkalenga nè mumufikishe ku dibenga kwitabuujà, pèndè mumanyè nè aci cìvwakù? Kàvwa mufwànyìne kwikala mwimàne kaaba aka dilòòlò edi nè Bible wèndè pa mwoyi wèndè to. Nwamònu anyi?

231 Sàtaanà ngudi uteeta kukufikisha ku dibenga kwitabuujà Eci. Ncyà bushùwà. Kùcìtèèlejìkù to. Vùlukàayi nè: "Yesù Kilistò ùdi umweumwe awu makèèlèlè, leelù, too nè kashidi." Nwamònu's, bintu ebi mbijaadikiibwe nànkù.

232 Mpindyewu twànjàayi ànu bònsò, nwènù bàdì ku cyoshelu eku aba, twèlàayi ànu byanza muulu cyanààna, kàdi twàmbè nè: "Mukalenge Yesù, nkwàcishèku ànu mpindyewu mene," muntu nè muntu ùsambila.

233 Taatù wetù wa mu Dyulu, tudi badisangishe kaaba aka, Éyi Nzambi, cidi pankaci pàà lufù nè mwoyi, bwà bantu bàdì biimàne kaaba aka aba. Nyumà Mwímpè àbwelè mu mwoyi wàbò mpindyewu mene. Swàkù bwà Bukolè bwà Nzambi bùlwe, bùdì bubàfikishe too nè ku cyoshelu eku abu, swàkù bwà Bùlwe kùdìbo mu dibìikà dyà ku lufù dyà Kilistò, nè bwàbàpakù Mwoyi munène wa Cyendèlèlèlè wùdìbo munkaci mwà kukeba awu. Mukalenge, maaèkèleeziyà myaba yònsò àdi munkaci mwà kufwà, mâyì à nyumà mmamwèke bu nè mmuumùshiiibwe pa buloba. Nènkù pàdikù mpungà bwà bantu aba kulwàbò mwínshì mwà Mpokolo apa, enzàku, Mukalenge, bwà misùukà yàbò yidì myumìnyine, dilòòlò edi ayi, yidì nè nzala nè nyòòtà yà Nzambi ayi, swàkù bwà yùjiibwè nè Nyumà Mwímpè mpindyewu mene. Enzàku nànkù, Mukalenge. Luse Lwèbè nè ngàsà biikalèku pambidi pààbò.

234 Mpindyewu lamàayi ànu—ànu mutù wènù. . . tǔngunukàayi nè kusambila, tǔngunukàayi ànu nè kusambila. Bantu bònsò, nwamònu's, tǔngunukàayi ànu nè kusambila. Ndi nnùsambidila. Nèngènzè cyònsò cìndì pàànyì mwà kwenza aci, kàdi ncyèna mwà kunùpèesha Nyumà Mwímpè to. Bikèngela Nzambi àcyènzè. Tàngilàayi, difwànyikijile Kilistò ànu kumpalà kwèbè

aku, mu meeji èbè amu. Tàngilà kwàka ùmonè ní udi umòna Kilistò kumpàlà kwèbè, paùdi ubwita kwísù apu. Dìbà adi nda buludì kudiYe, wámbe nè: “Mukalenge Yesù, ke mèmè ewu. Wèwè nè mèmè netwìkalè umwe, kubangila ànu mpindyewu ewu. Nèngàngatè Dìyì dyònsò dyúdi Wèwè mungambìle dilòòlò edi adi.” Mpindyewu shààlaayi ànu mwaba awu, tòngunukàayi ànu nè kushààla, nwènù bashààle dilòòlò edi, mààlabà, ditùkù didì dilondà, shààlaayi ànu too nè pààjikàku, nulòmba, biikàle nwitabuujà nè Nzambi neàkuuje nè dibàtiiza dyà Nyumà Mwîmpè.

²³⁵ Lwâkù apa, Don, bàlombòle mu disambila. Nzambi àkubènèshè, Don. 

63-1127 Buloba Bùdi Kàbidì Munkaci Mwà Kudishinda
Life Tabernacle
Shreveport, Louisiane États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org